

Okwikiriza Okuhikiriire

Jeffersonville, Indiana, USA

Okwamunaana 25, 1963

1 Tataitwe ow'omu Iguru, ekyo nikyo kignydererwa kyaitu eki. Twateeranira hamwe kwikiriza kwonka, kwikiriza Mukama Yesu kwonka. Hariho abari hanu, ekiro eki, abarwaire n'abarikubonabonesibwa, kandi tushoroire saaviisi ya-ya-yaitu ekiro eki ahabw'okutambirwa kw'abarwaire n'omubiri ogurikushasha. Hati, nk'oku omweshongozi yaaheza kweshongora ekyo kyeshongoro kirungi, Bwanyima Yesu Yaija, Ninkushaba ngu oije omu mwanya ogu ekiro eki ahabwaitu, Mukama, kandi okize boona abarikubonabonesibwa, kandi hatagira omuntu n'omwe owaatsigara ataine maani rwagati yaitu ekiro eki. Kikore, Mukama, kandi otuhwere twaba nitureeba omu Kigambo hati kutunga okwikiriza okurikwetengwa ahabw'eshaaha egi. Twakishaba omu Iziina rya Yesu. Amiina.

2 [Ow'eishe-emwe Branham yaagamba n'omuntu aha kituuti -Omur.] Hanu hariho gaarubindi, ezi omuntu anagire, kwonka zaatooratoorwa omu kanisa. Ku haraabe hariho . . . ku ziraabe ziri ezaawe, mpaho, ziri hanu aha kadaara, aha kituuti.

Hati, nimmanya ngu baingi n'abakozi, kandi bashemereire kutaaha kare, n'ahabw'ekyo tindikwija kugamba obwire buraingwa; reero mbaase kugiraho orunyiriri rw'ab'okushabirwa kushabira abarwaire. Ekyo nikimpa omugisha ku-kubaasa kuhika ahari bamwe ababaire nibeetenga kuhikwaho jubajuba omu kishengye, kureeba hati hati ntakataahiremu, kandi ehangwe eri. Bamwe aharibo, hatariho okubanganisa, bari kubi munonga, munonga kandi n'abarwani. Kandi mbaire ninteera esimu kugira ngu bashabire abarwaire. Okureeba omukono gwa Mukama Yesu nigukiza abarwaire n'abarikubonabonesibwa, ka Nimurungi!

Hati, titukira kugiraho zaasaaviisi ezi z'okutambirwa, ahabw'okuba kaingi tu . . . Omwoyo Orikwera naija haaba hariho orikwetenga obuhwezi bwa jubajuba, kandi ataantuura omu myoyo ahonaaho, kandi akyoreka kandi agira eki yaakigambaho. Reero abandi abaatsigara, ahabw'enki, tu . . . obundi nibaba batari kubi munonga, n'ahabw'ekyo tukirenzya amaisho. N'ahabw'ekyo naateekateekire nti, ahabw'okushangwa ndi hanu emirundi ebiri eriizooba, kishemereire kuba ngu tuheyo saaviisi emwe kushabira abarwaire . . . Niinyikiriza omu kukiza abarwaire. Niinyikiriza ngu n'okuragiira kwa Baiburi. Ekyo titurikubaasa kukibuurira, tutu . . . Engiri ejjwire, ekyo tutakitairemu.

3 Hati, nikibaasika . . . na hati tinkamanyire, tinkateire esimu omuka eriizooba, nikibaasika ngu Sande eraakurateho nimbaasa kuba hanu ogundi murundi. Kandi ku-ku muraabe mutagarukire kuhurira okuruga ahariitwe saabiiti egi, Billy ku araabe atabamanyiise (naija kumanya bwanyima y'obwire bukye omu sabiitii egi), ku muraabe mutakihuriire, obwo nitwija kuba hanu ogundi murundi Sande eraakurateho; 'habw'okuba ekyo nikibaha Ekiro ky'Abakozi, nimureeba, kuhuumuraho, mbwenu . . . nimmanyisa eky'okutaahiraho. Mwareeba? N'ahabw'ekyo nitwija kugyezaho, Mukama ku araakunde. Hati, ni kirungi, ku muraabe mutahuriire . . . Ningira ngu Billy naija kuboohereza kaada, nari abagambre omuri zaasaaviisi omu buryo bumwe, n'ahabw'ekyo ku araabe atabateereire esimu, obwo ningaruka ahabw'e-ahabw'e . . . Sande egi erikwija. Ow'eishe-emwe Neville, ku kiraabe kiri kirungi kugaruka? [Ow'eishe-emwe Naville yaagamba n'Ow'eishe-emwe Branham -Omur.] Oo, ekyo ni kirungi.

4 Ku haraabe hariho omuntu weena orikwenda kumanya, Collins omuto ogu, hanu. Kandi omu bwire bw'Obumanyiso Mushanju, abashaho bakaba baagambiire akoojo kato ako, kaine omushwija gw'amahenengye, ngu kakaba nikateekwa kubyama aha mugongo gwako kandi kakanywera omu rushekye; ekyo-kikaba kiri ekyo. Kwonka ishe na nyina baakareeta omuka kandi baakata omu kishengye, baakashabira. Kandi Mukama Yesu yaakakiriza kimwe, kaagaruka aha ishomero; reero abakuru baabeeta baababuza ahari ekyo. N'ahabw'ekyo baayeta omukugu owaabaire naamujanjoba, kwonka tiyabaasa kwikiriza . . . Akaba atarikubaasa kwikiriza ekintu nk'ekyo, n'ahabw'ekyo akoojo ako baakareeta kukakyebra, kandi kakaba kari gye, kakiriire kimwe. Reero, Yesu yaija, amaani g'omuregi gaasingurwa!

Nimumanya, ekintu ky'omutaano, naaba ninza kushaba omuntu omwe kweshongora ekyo kyeshongoro ekiro eki. Mbwenu ku naaba nimpeereza omu kishengye okwo, nkikyo kyaija, omuntu omwe yaakyeshongora hanu, Bwanyima Yesu Yaija. Kuri ekyo-ekyo kitaayeshongorwa, naaba ninza kushaba omuntu omwe ngu akyeshongore ntaka-ntakagambire ekiro eki. N'ahabw'ekyo, A-Akora byona kurungi.

5 Hati, baingi omuriimwe nimwija kuba mutegyereize okuhitsya omu kasheeshe, abaine engyendo ndaingwa z'okugyenda, kandi ni-ninsiima omuzimbwe ogwo-ogwo. Bamwe omuriimwe nimuza kuvuga mutaahe ekiro eki 'habw'okuba nimuteekwa kuza kukora bwaba nibutaagurikana, omu kasheeshe, kandi ni-nimmanya ngu kigumire. Kandi ku ndikuteekateeka, okureeba ekyo . . .

Naanye ezo mbeera zinyijaho, nimumanya; nguubwa kubi. Mpika ahu ndiku . . . Ekinkwata, n'oku ndikutunga ezo mbeera naakora oburengye, reero Sitaane akaija nangambira ati "Waamanya, tihariho orikukufaho. Buzima toine omunywani omu nsi, waareeba." Kandi okugira ngu . . .

Mwijukye, naanye okwohibwa nikumpikaho. Mwareeba, okwo ninteekwa kukusingura. Mbwenu ku ndikureeba enyima kandi nkareeba ekintu nk'eki, ninkita omu maisho ge honyini reero ngira nti, "Kandi shi eki?" Ekyo nikimpwera ku-kusingura. "Kandi shi eki?"

6 Nka munywani wangye omwe, oshutami omu-omu ruteerano hanu, hakaba hariho o-o-oruganda, nk'o-

oruganda orutarikwikiririza omu kutamba kwa Ruhanga, abaizire aha mushaija muto ogu enshumi nkye ehwiringe kandi bakamugira bati, "Ebyo bintu ebi barikubuurira okwo ahari okwo kutamba kwa Ruhanga, tibirimu muhoho."

Kandi omushaija ogu naatuura omuri Kentucky, haihi munonga n'omukaikuru ou, obu twabaire turi Akton Campgrounds, owaabaire naitwa ekookoro. Kandi murumuna we akaija omu ruteerano ekyo aine akatambaara omu nshaho ye aku yaabaire aijaine, kandi Omwoyo Orikwera yaayeta ogwo mukazi enyima okwo (kandi nkaba ntakazaga omu ihanga eryo) kandi yaamugambira ngu "akaba aine akatambaara omu nshaho ye, ngu ako akaba akaine, aku yaabaire aihire omuka, kandi ngu murumuna we akaba ari okwo aha mugongo nanka, naitwa ekookoro y'omunda. Abashaho bakaba baamuhweire amatsiko." Reero naagira nti, "Gyenda ote aki katambaara ahari ogwo mukazi, ahakuba OKU NIKWO MUKAMA ARIKUGIRA, 'Naija kukira.'" Kandi ekyo nikyo kiro, obu abataahi eruguru okwo baateekateekire ngu hakaba hariyo ekibiina ky'aba Salvation Army, obu Ow'eishe-emwe Ben yaahikire eruguru okwo, reero bakata e . . . Reero ogwo mukazi yaakirira kimwe okuhitsya obu arikukora emirimo ye n'ey'abataahi.

7 N'ahabw'ekyo omushaija muto ogu, arikumanya ekyo, yaagira ati, "Kyo shoboorora ekyamubaireho! Ekyo nikimara empaka. Shoboorora; noomanya ngu akaba aine ekookoro. Ogwo mukazi akaba ari hanu omuri Louisville kandi abashaho abaabaire bari ab'okumushemeza, baitu baahinduka baagira bati, "Mumubaziire, mumugarureyo, ahakuba tihariho ekirikubaasa kukorwa.' Kwonka hati akiriire kimwe, ari gye." Ati, "Ekyo kishoboorore." Ekyo kikamara empaka. Mwareeba?

Nimumanya eki Baiburi erikugamba? "Kandi bakaba batarikubaasa kugira eki baagamba, ahabw'okuba ogwo mushaija akaba ayemereire rwagati yaabo honyini, owaakoreirwe eky'amahano." Aho niho tu . . . Nikituma Sitaane yaashwara, tikwo? Ogwo mushaija ou eky'amahano kyakoreirwe akaba ayemereire aho.

Ruhanga azoora abafu? Hanu hashutamiho omushaija, hanu honyini, owaazookire omu bafu. Ruhanga atambira abarwaire? Oo mugyenzi, emikono ekaaza ahaiguru hoonahoona. Ruhanga atambira abarwaire. Kandi nitumanya ngu Niwe MBAHO omukuru-omukuru, atari "nkaba ndiho" nari "ndyabaho" omukuru; MBAHO. MBAHO, ogwo "otaburaho obwire bwona, hoonahoona, obwire bwona"; otahinduka oku abaire ari nyomwabazyo, n'eriirooba nikwo ari, kandi nikwo ariguma ebiro byona.

8 Hati, kurahutsyaho, ka tubiikuure omuri Baiburi eyahaire omugisha. Niinyenda kushoma e-ekicweka e-ekyabaire "kinzengyereza" ku naabaire nkishoma. Kandi niinyenda kugiraho orunyiriri rw'ab'okushabirwa ekyo eki, kandi nshabire buri omwe orikwenda kushabirwa.

Kandi hati twaza kubiikuura omu kitabo kya Mako, Mako Orikwera, eshuura ya 11 y'ekitabo kya Mako Orikwera. Kandi twaza kushoma kutandikira nk'aha-aha mushororongo gwa 22 ogw'eshuura ya 11 y'ekitabo kya Mako Orikwera. Kandi baangi omuriimwe nimumanya ngu Ekyahandiikirwe eki, N'eky'obutoosha munonga. Nikyo Kyahandiikirwe eki naabaire nintekateekaho, Ow'eishe-emwe Russell, obu ezo . . . obu Yangambira ahari zaakamugye ezo. Kandi zi . . . ekyo nikyo Kyahandiikirwe kyonyini eki naabaire nintekateekaho. Kitwire kiri ekishaakuzo. Akagira ati, "Ku murigambira"; atari "Ku Ndigambira". "Ku murigambira!"

9 Hati, ka tushome.

. . . Yesu yaabagarukamu naagira ati: Mwesigye Ruhanga!

Kandi buzima nimbagambira nti: Weena origira orushozi oru ati, Tsinduka, onagwe omu nyanja, atarikubanganisa mu mutima gwe, naikiriza ngu eki arikugamba nikija kubakwo, aryakikorerwa.

Nikyo ndikubagirira nti: Byona ebi murishaba omu kushaba kwanyu, mwikirize ngu mubihairwe, kandi kwo muryabiheebwa.

Obutoosha ku muraagume mwayemerera nimushaba, mwaba mwine ekigambo aha muntu weena, mumusaasire; na Shoimwe . . . na Shoimwe ori omu iguru abone kubasaasira eby'okushiisha byanyu.

Ahakuba ku muraabe mutarikusaasira, na Shoimwe ori omu iguru taribasaasira by'okushiisha byanyu.

10 Hati, okwikiriza kwegamiire aha kusaasira, obwo. Reero, nk'oku tugambire akasheeshe aka, kugyezaho kureeta ekanisa kugihitsya omu mwanya ogu buzima turikubaasa kureeba obwire by'entumwa burikubaho rwagati yaitu, ekyo nikyo twena twiniire enjara. Kandi bwahikire aha rwigi. Nitubureeba, kwonka nitwenda kubureeba omu bwingi. Nitubwenda ngu buhimintikye kugira ngu bu-butuhwere, buhimintikye buhikye aha bandi.

Mwijukye, Yesu (nk'oku tukireebire omu ishomo akasheeshe aka), Tarakozeise amaani Ge Ahariwe, Akagakozesa aha bandi. Ekyo nikyo gaayohereziibwe. Kandi obundi nooteekateeka oti, "Ahabw'enki Omuntu owaabaire aijwire amaani, Nkawe, yaabaire naabaasa kurwara?" Eego, sebo. Nkashoma omu kitabo kimwe, ahantu nanka, ahi obu Yaazoora omwojo ogwo, omwana w'omufakazi wa Naini (niinyikiriza n'ekitabo ekirikwetwa, The Prince of the House of David), ngu Akashutama aha rukiri kandi yaataka ahabw'okuteerwa omutwe. Mwareeba? Akeekorera obweremwa bwaitu. Okwekorera nikimanyisa "kubyegura." Mwareeba, Akeekorera.

Kandi Akaba aine ebintu byona omu . . . nk'oku tubiine. Akaba aine oburwaire, akaba aine okwohibwa, Akaba aine emirabanamu, Akaba aine okushobangirirwa nk'oku naitwe tukwine, ahabw'okuba Akaba naateekwa kuba Omuteenani ohikire; n'ahabw'ekyo Akaba naateekwa kukwatanisa, Omuhingi w'ebiana, Atakabaasize kumanya. Omukazi aha iziba n'ebindi bingi, mwareeba, twareebera kimwe omu Byahandiikirwe.

11 Niinyenda kugamba ku ndikwikiriza ngu buri Kyahandiikirwe, kandi na buri kacweka Kakyo koona ku n'amazima. Hariho abahakani eriigyenda abatarikwenda kukiikiriza ekyo. Omuhakani rimwe akagira ngu "obu Yesu yaatuma abeegi abo ahu ogwo mwana gw'endogoya gwabaire gutsibikire, ahu emihanda ebiri yaabaire neebuganira, ngu Akashangwa ekyo yaakitebeekaniise kareho ahu ogwo mwana gw'endogoya gwabaire nigusa kutsibikwa." Mwareeba, tibarikumanya ngu Ruhanga akakitebeekanisa kareho kitakabaireho.

Ruhanga akangambira, ekiro kiri, n'Ow'eishe-emwe Dauch hanu, ngu ninza "kumukwata omu ngaro, omu ruguuto rw'omuri tauni ogundi murundi." Ekyo n'eky'omutaano munonga, nkaba ntari hanu ako kasheeshe; kwonka kuri haahingwireho edakiika ibiri, nari hakahinguraho edakiika emwe, nkaabaire ntarikwija kumubugana omu ruguuto rw'omuri tauni. Kwonka nkaruga nti omu motoka omu bwire bwonyini bw'okumukwata omu ngaro obu yaabaire naataahamu, omu ruguuto rw'omuri tauni. Akaba atarikuumanya; akaba ajwiremu gaarubindi ze, akaba atarikubaasa kundeeba. Ku yaahuriire eiraka ryangye, yaatandika kurira. Kikaba kiri ki? Ekyo takira kukikora, kwonka kukaba kuri okugarukwamu eki yaabaire agambiirwe eruguru okwo ari ahansi y'ekyoma ky'okumubaasiisa kwitsya omwoya; akaba naaza kukikora.

Naagira nti, "Nabwo noija kugaruka oshutame omu kanisa"; ekyetengo ky'omutima gwe. Obu twabaire twine oruteerano rwa Chicago, akaba naayenda kwija omu ruteerano orwo, omutima gwe gukaba nigukyenda. Nkamwoherereza kaada y'endamutsyo ezirkuruga ahariitwe, abaana, kumugambira ngu tukaba nitushaba ngu akire, jubajuba. Kandi ow'eishe-emwe omukundwa, owaamutaayaayiire, akagira ngu aka-akaba naayenda munonga kwija. Mbwenu ngugu ashutami hanu, ekiro eki, naitwe. Mwareeba? Ekyo tikiratebeekanisiibwe kareho kitakabaireho. Ruhanga ogwo omwe niwe yakitebeekaniise. Naatuma byona byakorera hamwe kuhikiiririra kimwe.

12 Omuhakani rimwe akagira ati "Tiky'okutangaaza Yesu akaba naabaasa kukwata emigaati etaano reero akariisa abantu enkumi itaano," ati, "ebiro ebyo emigaati ekaba eri mihang, n'ahabw'ekyo Akashara buri mugaati kuriisa abantu rukumi."

"Ninkumanyisa ngu, akoojo kakaba kagiine omuri kyamushana yaako!" Akaana kato kakaba kaine emigaati etaano eyaabaire neebaasa kuriisa abantu enkumi itaano, kandi bakaiguta. Reero shi, ebiibo ebyo ikumi na ibiri ebijjire ebi baatorotoire bwanyima? Mwareeba? Oo, niba . . . abo n'abahakani kwonka, nikyo ekyo kyonka. Ekyo tikirikuhindura Ekigambo kya Ruhanga. Tikihinduka, nikigumizamu.

13 Hati, nitwenda kugamba aha kwikiriza hati, kandi okwikiriza kw'omutaano: Okwikiriza Okuhikiriire. Ekyo n'ekintu kikuru. Hati, okwikiriza, nitugambirwa omuri Baiburi ngu, "Okwikiriza kuruga omu bi tuhurira." Hati, torikubaasa kujunwa otaine okwikiriza. Kandi okwikiriza n'ekintu eki orikwikiriza ngu kiriho, ngu tihariho ekintu ekirikubaasa kworeka ngu kiriho kureka okwikiriza. Hati ningyezaho kubareetera okwikiriza, kugira ngu mwetebeekanisize orunyiriri oru rw'ab'okushabirwa, omu dakiika nkye eziraakurateho.

14 Hati, okwikiriza: "Omuntu weena orikwija ahari Ruhanga naateekwa kwikiriza ku Ariho." Kandi tikirikubaasika ku-kusHEMEZA Ruhanga otaine okwikiriza, torikubaasa KumusHEMEZA. Kandi ku oraagire ngu noikiriza Ruhanga . . . Tokamureebaga, waareeba, n'ahabw'ekyo obwo nooteekwa Kukiikiriza ahabw'okwikiriza. Kandi kuri noobaasa Kumureeba, nikuba kutakiri okwikiriza. Mwareeba? Ekintu kyona eki ebihurikizo by'omubiri bihamya, nikiba kitari okwikiriza, n'ekirikuhamibwa saayansa; waareeba, tikikiri okwikiriza. Kwonka nooteekwa Kumwakiira ahabw'okwikiriza. "Kandi orikwija ahari Ruhanga naateekwa kwikiriza Ruhanga; kandi okwikiriza kuruga omu kuhurira Ekigambo kya Ruhanga." Waareeba? Nooteekwa kubanza waikiriza eki ku kiri Ekigambo kya Ruhanga, kandi nooteekwa kwija ahari Ruhanga noorabira omu Kigambo. Mwareeba? Twara Ekigambo kwonka, Eki kirikugamba, kandi "Ekyo kihikire!" Ekindi kyona EKIRIKUKIHAKANISA, tikihihire.

Abrahamu akaba naateekwa kwikiriza eki Eiraka eryo ryamugambiire. Kandi ku yaahikize emyaka igana, ahanyima y'emyaka makumi abiri na itaano, akaba Naakiikiriza munonga okukira obu yaabaire aine emyaka makumi abiri na itaano ey'enyima obu Yaakiheebwa. Mwareeba? Akakiikiriza. Kandi, "Akata amaisho aha bi Ruhanga yaaraganiise, tiyaabanganisibwa kutaikiriza, kureka yaagumibwa okwikiriza, yaahimbisa Ruhanga, yaamanya ngu eki Ruhanga yaaraganiise naabaasa kukikora." Kandi ogwo nigwo muhanda, buri omwe naateekwa kuba atyo. Nooteekwa kwija n'okwikiriza okutarikuremwa, noikiriza ngu Ruhanga akaraganisa. Kwonka hati, nooteekwa kuba omu mbeera y'okugira okwo kwikiriza, kandi ekyo nikyo kitumire turi hanu kugambaho; mwareeba, kutunga okwo kwikiriza.

15 Omu Baheburaayo, Ekitabo ky'Abaheburaayo, eshuura ya 11, ekyo nitukigambirwa.

. . . okwikiriza nikwo kuhamiza kimwe ebi twineho amatsiko, . . .

Hati, hanu niho abantu baingi baremerwa kutunga okutambirwa kwabo, nari eki barikushaba, ahabw'okuba okwikiriza bakutwaramu kuba ekintu eki kutari. Mwareeba? Tibarikukiikiriza. Ti-ti . . . ti-tikiri kiteekateeko.

N'okuhamiza kimwe.

Hati, hurikiza otaireho omutima! Mwareeba, ti kintu eki orikuteekateeka. Kuriho buzima ahariiwe nk'oku ekihurikizo kyona eky'omubiri gwawe kirikubaasa kuranga ekintu kyona. N'ekintu ekirihohuzima nk'oku eriisho ryangye ryakugira riti, "Oru n'orupapura." N'ekintu ekirihohuzima nk'oku waakugamba ngu "kiriya n'ekyererezi." N'ekintu ekirihohuzima nk'oku waakugira oti, "Naakwata aha kooti yangye." N'ekintu ekirihohuzima nk'oku waaku-waakuhurira omwana muto oriya naagambira hari, nari naayomba. Mwareeba, n'ekirihohuzima kityo, nk'ekyeshongoro ekirkweshongorwa. N'ekintu ekirihohuzima nk'oku naakuroza ekintu kyona omu kanwa kangye. Nikwo kuriho buzima, okwhiaho ngu tokaakworeka ondijo muntu. Niiwe wenka okwine. Amiina! N'okwawe. Okwikiriza n'ekintu ekirihohuzima; mwareeba; ti kitebyo ekigunzirwe. N'ahabw'ekyo, abantu baangi baija . . .

Hati, aga n'amashomo agatsimbire emizi munonga, n'ahabw'ekyo ninza kukwata eby'ahaiguru, bwanyima mutimbe mutaahemu. Mwareeba?

16 Mwetegyereze, n'ekintu eki oine; ti kiteekateeko, ku oraabe okwine buzima. N'ekintu ekirihohuzima ahariiwe nk'ekindi kintu kyona oku kyakubaho. N'ekintu ekirihohuzima nk'oku wa-waakumanya ngu-ngu oriyo noovuga emotoka. N'ekintu ekirihohuzima nk'oku orikumanya ngu oshutami omu kanisa. N'ekintu ekirihohuzima nk'oku orikuhurira eiraka ryangye. N'ekintu ekirihohuzima, ti kiteekateeko, ti kukyamukirira; kureka n'ekintu eki oine, kandi nookutunga okuruga omu kuhurira Ekigambo kya Ruhanga, kandi Ekyo kyonka. "Okwikiriza kuruga omu bi tuhurira, kandi okuhurira Ekigambo kya Ruhanga." Ekyo nikikuta enyima okwo ahu okwikiriza kwawe, obwo, kutari omu muntu ondi. Tikuri mu muntu. Tikuri mu kibiina ky'ediini. Tikuri mu kibiina ky'abantu. Kuri omuri Ruhanga, ahabw'okuba Ruhanga niwe Kigambo. Okwikiriza kwawe kuri omuri Ruhanga.

Okwikiriza kuruga omu kuhurira Ekigambo kya Ruhanga.

N'ahabw'ekyo Ruhanga, ahabw'Ekigambo Kye, . . . atari ahabw'ekyo ondijo muntu yaakozire, eki ondijo muntu yaagambire, kureka eki Ekigambo kya Ruhanga kyagambire. Akagira ati, "Ka buri kigambo ky'omuntu kibe ekishuba, kwonka Ekyangye kibe Amazima."

17 Hati, mwareeba ondijo muntu yaakora ekintu ahabw'ekigambo, ekikorwa kya Ruhanga, okuraganisa kwa Ruhanga; kandi baangi omuribo bakagira bat, "Naanye, ekyo nimbaasa kukikora." N'ekiteekateeko. Kandi ku barikukikora, noobashanga baremeirwe aheeru okwo ahantu nanka. Nikiteekwa kuba ekintu ekirikyo. Hati, omu buryo bumwe okwo n'okwikiriza. Ekyo n'ekintu ekirkubaasa kukuhitsya aha kwikiriza. Nikyo omu buryo bumwe, nk'oku waakumbuuza omuti gw'omwela, haza nkakuha embibo y'omwela. Omu buryo bumwe oine omuti gw'omwela, kwonka tigukeezaire; kwonka ku gurikukura gukeezara, n'omuti gw'omwela. Kandi waateekateeka ngu Ruhanga naakora eki, . . . Kwonka kyaheza kukushuuruurirwa, obwo n'okwikiriza, Okwikiriza Okuhikiriire okutarikubaasa kuremwa.

Egyo niyo nshonga ahabw'enki okworekwa okwo kuri kukuru munonga-munonga ahariinye, ahabw'okuba kukaheza kuhamibwa ku "kuhikire" buri kaire. Mwareeba? Kandi nimmanya ngu ekyo Akakiraganisa. Kandi Akakiraganisa omu Kigambo Kye, mbwenu Ngugu hanu yaija kandi Yaakiraganisa ahabw'ebiro ebi. N'ahabw'ekyo, noomanya ahu oyemereire, Yaaba yaakigambire. Mwareeba, ekyo nikimpa okwikiriza, ahabw'okuba Takora kintu kyona ekirkuhakanisa Ekigambo Kye ekihandiikirwe. Mwareeba? Kandi ku kyakuba nikihakanisa Ekigambo, tinkaakigiramu okwikiriza. Nikigarura aha Kigambo, mwareeba, okwikiriza omu kuhurira Ekigambo kya Ruhanga. Nooteekwa kuhurira Ekigambo! Ekigambo kya Ruhanga n'Ekigambo ekirikumara byona. Nikyo kyonka eki orikwetenga, n'Ekigambo eki.

18 Hati, okwikiriza ahabw'okuba ekintu ekirkuhamiza kimwe, kandi omwo tushangire (omu kitabo ky'Abaheburaayo) eki okwikiriza kubaire kuri, kandi n'eki abaabaire baine okwikiriza baakozire. Mwareeba, n'emirundi mingi obu abantu barikuba baine okwikiriza eriizooba, kwonka nyecakare babe batakwine; ekiro ekyakurataho habeho ekintu, n'ekindi kintu. Kwonka Ruhanga ku arikuheza kukuhamya, kandi okakureeba, tihariho ekintu kyona ekirkubaasa kutuma waakurugaho. Oriyo nooyegyemamu, nookwatakwata, nooteebereza kwonka. Kandi okuteebereza "n'okukora ekintu otaine rusa"; oriyo noogyezaho eki kwonka, kandi noogyezaho eki, kandi nootoora oku, kandi noirukira hanu, kandi noirukira kuri. Tokatungire okwo Kwikiriza! Kwonka ku . . . okwo nikwo tweta "Okwikiriza."

Ni-ni-ni . . . Munsaasire. Niinyenda ngu mu . . . Yebare, ow'eishe-emwe.

Ni-niinyenda ngu eki mukyetyegyereze hati. Itwe . . . Ekanisa neeteekwa Kweimutsya ekaza omu maani ga Ruhanga. Eta? Turi haihi munonga n'obwire bw'aha muheru, hati; kandi niinyikiriza ngu Ekanisa eri omu mbeera ei turikubaasa Kugyegyesa ebintu ebitsimbire emizi kakye, kandi tukasiimuura bimwe ahari ebi by'obutaikiriza, mwareeba, reero tukataaha omu kintu ekirikyo. Mwareeba? Nikiteekwa kuba ekintu eki orikumanya!

Kandi ku oraagire oti, "Ow'eishe-emwe Branham, ogwo tiguri mushana."

"Kwonka nabwo nimmanya ngu n'omushana."

"Noomanya ota ngu n'omushana?"

“Ndiyo ningureeba.”

“Mpaho, noomanya ota ngu togwire?”

“Amaisho gangye gatuura nigaamanyisa ngu ogwo n’omushana.” Mwareeba?

19 Kandi egyo niyo nshonga erikutuma naikiriza okworekwa okwo, 'habw'okuba kutuura nikweyoreka ku gari amazima, 'habw'okuba kuruga omu Kigambo. N'ahabw'ekyo ku Arikukigamba, ekyo nikimara. Hati, ku kirikugambwa kityo, nihaba hatakiriho okuteebereza kwona, nikiza kubaho. Obwo nookihurira “OKU NIKWO MUKAMA ARIKUGIRA,” waareeba, ahabw'okuba ki-kirengire okuteekateeka kw'obuntu. Kuri hare okwo omu byanga by'okuteekateeka kwa Mukama. Kwonka oyemereire hanu, nk'Omusaabibu . . . nk'eitaagi erirkwana ebyana ebiri omu Muzaabibu. Mwareeba? Ruhanga akozesa omuntu, kandi omuntu wenka. Ruhanga takozesa ekyoma. Ruhanga takozesa ebibiina by'abantu. Ruhanga takozesa ebibiina by'amadiini. Ruhanga akozesa omuntu okwe, obutoosha!

20 Hati, okwikiriza n’ekintu ekirikuhamiza kimwe, kandi ahabwakwo, nitwetegyereza ngu, ebintu ebyo byona nibikorwa. Ti-ti kiteekateeko, n’ekintu ekirikuhamiza kimwe; okukira munonga Okwikiriza Okuhikiriire. Ekyo nikyo ndikugambaho ekiro eki, kuhika aha Kwikiriza Okuhikiriire. Ti kiteekateeko.

Hati, abandi, abantu bamwe baija bagira bati, “Oo, nyine okwikiriza kwona; oo, buzima nkwine.” Mbwenu, hanu oyemereireho noosherura ki, obwo? Mwareeba? Mwareeba, e-ebikorwa byawe byonka nibyoreka ngu toine eki orikugambaho. Mwareeba? Ku oraabe oine okwikiriza, ahabw'enki oyemereire omu runyiriri rw'ab'okushabirwa? Mwareeba? Ebintu ebyo nookora eby'enki?

Mwareeba, kuri oine Okwikiriza Okuhikiriire, amaisho okagateereire kimwe ahari Ruhanga reero okakiikiriza, haza okeegyendera. Tikikaakwetaagisa kwija omu runyiriri rw'ab'okushabirwa. Ebintu ebi nooba otarikubyetenga, ahabw'okuba okwikiriza kwawe kwaherize kukikora batyo. Mwareeba? Kikangasira ki nyowe kugira nti, “Nshemereire kujwara esaati”? Esaati ngijwaire!

“Noomanya ota ngu ojwaire esaati?”

“Mpaho, ningireeba, ngikwataho, n’ahabw'ekyo nimmanya ngu eriho.” Mpaho, okwo nikwo kirikuba kiriho Okwikiriza Okuhikiriire kwaheza kuhama. Nooba ota-otakyetenga bundi. Kyaherize kukorwa; nookimanya.

“Nookimanya ota?”

“Okwikiriza nikukingambira!” Nikyo ekyo. Mwareeba? Mwakyetegyereza hati, eki ndikumanyisa? Okwo Kwikiriza Okuhikiriire.

21 Hati, omu bindi bigambo, ndiyo niinyikiriza faa, “Mpaho, naaza kugyenda. Baiburi neegira eti, ‘Atume aha bakuru b'ekanisa, bamusiigye amajuta, bakishabire.’ Nimmanya, naaza kwinamukayo.” Reero ogire oti, “Mpaho, ninza kukira.” Mwareeba, nookyekora iwe wenka; waaba oteegyendesereize hati, nooza kwekora-kucamukirira. Reero waaheza kurabamu, ogire oti, “Oo, ti-ti na hati tinka . . . ? . . .” Mwareeba, aho niho obaire ori, obaire otaine okwikiriza!

Okwikiriza kwawe kw'amazima nikuza kukikorera aho honyini. Okwikiriza kwawe-kwawe kw'amazima nikuza kutuma kyaba ekirikyo buzima ahariiwe ku . . . Reeba ogwo mukazi mukye orwaire ekyejwiso, akagira ati, “N’obu naakukora aha mukugiro gw'ekijwaro Kye kwonka, nkaakira.” Kandi ahonaaho ku yaakozire atyo, akagira ngu “akahurira omu mubiri gwe ku ekyejwiso kyayoma.” Buzima akakiikiriza.

Kandi ku Yaakikwatsireho . . . kuhamya ngu ekyejwiso kikooma-kikooma, Yesu akahinduka kandi yaagira ati, “N’oha Owankoraho?” Okwo Kwikiriza Okuhikiriire! Kandi okwo Kwikiriza Okuhikiriire nikwo kumwe ekiro eki, nikuza kukora ahari Yesu nk'oku kwakozire buri. Ogwo mukazi akaja aine Okwikiriza Okuhikiriire ahabw'obwire obwo.

22 Hati, hati nitureeba, omu kubanza abeegi bakaba bataine Okwikiriza Okuhikiriire oku. Bakaba batakwine, ahabw'okuba bakaba baine Kristo, nibagyenda Nawe; kwonka bwanyima, Kristo akaba ari omuribo. N'ahabw'ekyo, nimureeba, kigumire kugira Okwikiriza Okuhikiriire oku otaine Omwoyo Orikwera; Naateekwa kukureeta, Naakureeta. Hati, noogira oti, “Abeegi bakaba bataine Okwikiriza Okuhikiriire?” Ngaaha; ahakuba bakaba baine omwana orikugwa entsimbo aho, ou baabaire nibagyezaho kubingaho daimoni ogu, kwonka tibarabaasize kumubinga.

Kandi ishe akareeba Yesu naija, reero yaagira ati, “Twareeta omwana wangye aha-aha beegi Baawe, kwonka tibaabaasa kumutambira.” Mwareeba?

Reero ahanyima, abeegi baabuuza Yesu, nibagira bati, “Ahabw'enki tutaabasa kumutambira?”

Kandi Yesu yaabagarumu ati, “Ahabw'okuba, n’ahabw'okutagira okwikiriza, obutaikiriza bwanyu.” Ekyo kihikire. “Ahabw'obutaikiriza bwanyu . . .”

23 Hati mwijukye, bakaba baine obushoboorozi. Yesu akaba abahaire obushoboorozi bw'okukiza abarwaire,

kuzoora abafu, n'okubinga baadaimoni, ebiro bikye ekyo kitakabaireho. Bakaba baine obushoboorozi, kwonka bakaba bataine okwikiriza kw'okukozesa obwo bushoboorozi. Hati, ngigyo tabirinaakuru ya Branham! Ngigyo Ekanisa, Omugore, w'ebiro ebi! Omwoyo Orikwera ari hanu n'amaani, kwonka imwe, timwine okwo kwikiriza kubukozesa. Nimureeba eki ndikumanyisa? Nikyetaagisa okwikiriza kubukozesa.

Hanu: nyineho ekikompora eki nttaire omu mbundu n'engaro. Nimmanya eki kiraije kukora ahaw' emikorere y'ebirwaniso, nk'Ekigambo, kwonka ninteeekwa kurasha egyo mbundu. Omuriro niguteekwa kuhika aha buganga. Obuganga bwine amaani, kwonka nibuteekwa kugira omuriro gw'okubucumika. Kandi ekintu nikyo kimwe, obuganga buri omu kikompora, kwonka nibwetenga okwikiriza kw'okubucumika reero kukabunaga aheeru. Ekyo nikyo kirikwetaagisa, mwareeba, Okwikiriza Okuhikiriire kucumika amaani g'Omwoyo Orikwera ou twine hati, nk'oku atwizireho; okwikiriza kw'okucumika, kureeba ebantu bikuru, n'oku . . . okwikiriza, ekintu ekirikukikuha.

24 N'omutima ogwijwiremu rukundo, noogyenda otaaha omu kishengye kyabarwaire, orikumanyira kimwe eki orikuza kugamba. Otaahamu kandi orikumanya ekirikwenda kubaho, hariho ekyaherize kushuuruurwa, kandi nookimanya. Reero otaahamu, "Omu Iziina rya Yesu Kristo, imuka orugye aho. OKU NIKWO MUKAMA ARIKUGIRA!" Nikyo ekyo; okwo n'Okwikiriza Okuhikiriire. N'obu aho haakuba heemereireho abantu miriyoni ikumi nibagira ngu tikikaabaho, noomanya ngu nikiza kubaho oku biri kwona, 'habw'okuba nookimanya. Nikiza kubaho. N'obu omuntu weena yaakugamba ki, niiwe oine okwikiriza.

Noobaasa kuteekateeka, Yoshua, akaayetsire abakuru ba Israeli kandi abagira ati, "Aa, b'eishe-emwe, turi abagaragwa ba Mukama, niinyenda ngu mugire muti . . . mushabe Mukama ku kyakuba kiri kirungu ku Araabe naabaasa kutwongyeraho omushana mukye, mwareeba, reero akeemereza eizooba akaanya kakye"?

Ngaaha; akaba naakyetenga (kandi hatariho okushaba, hatariho ekintu kyona), akaba naakyetenga, n'ahabw'ekyo akafa kuragiira eizooba! Akagira ati, "Yemerera aho! Nyine ekyetengo, kandi ndi aha murimo gwa Mukama, kandi Akantuma hanu kukora omurimo ogu, kandi ndiyo ninkora nk'oku ndikubaasa, kandi omuzigu yaataataana, kandi bari aheeru hanu; ku ndaikirize eizooba rikarenga, nibajia kweteeranira hamwe reero bambeere ekizibu okukiraho. N'ahabw'ekyo, yemerera! Kandi, kwezi 'we, yemerera aho!" Amiina; rikeemerera aho okumara eshaaha makumi abiri na ina.

25 Hati, ensi ku eraabe neeyetoroora kwonka akagyemereza, kandi eizooba rikaguma aho kandi ritarugyeho, obwo hakabaho ki? Hati, nooyehindura omukaafiiri, eki ku oraakigambe; kandi ku oraabe otakikozire, obwo buzima sayansa neeba yaakuhindura omuschema, 'habw'okuba nibagira ngu ensi ku yaakwemerera, ekaagwa ahansi. N'ahabw'ekyo hati obwo niki? Kandi ku oraagire ngu Ekigambo kya Ruhanga tikihikire, obwo ori omukaafiiri. Mwareeba? Kwonka kikabaho, ekyo nikyo kikuru. Emikorere yaakyo tindikugimanya, kwonka kikabaho!

Emikorere y'Omwoyo Orikwera tindikugimanya, kwonka nimmanya ngu Akaanyijaho. Ti-tinkaabaasa kushoboorora emikorere Ye, kwonka nimmanya emigisha Ye. Ekyo-ekyo nikyo kyonka e-eki ndikwenda kumanya, n'emigisha y'Omwoyo Orikwera. Kandi emikorere, ebyo Niwe obikora, egoo n'enaama Ye.

Omwojo ogu akaba atarikubaasa kutambirwa, ahaw'okuba . . . Abeegi bakaba baine obushoboorozi; Yesu akabaha obushoboorozi kukiza endwara za buri muringo, kubinga baadaimoni, kuschemeza ababembe, hamwe n'okuzoora abafu. Akabaha obushoboorozi, kwonka bakaba bataine okwikiriza kw'okukozesa obwo bushoboorozi obu baabaire baine. Reero baabuuza Yesu kandi baagira bat, "Mbwenu, hati, ahaw'enki turemirwe kukikora?"

26 Hati, mwijukye, bakaba baine Ekigambo; kandi Ekigambo kikaba kiri Omuntu obwire obwo. Reero Ekigambo kyabagambira kiti, "Naabaha obushoboorozi." Amiina! "Naabaha obushoboorozi." Kandi bakaba baine obushoboorozi, kwonka bakaba bataine okwikiriza kw'okukozesa Ekigambo ekyabaire kiri omuribo. Mwareeba eki ndikumanyisa? Kwonka Yesu akaba akwine, Akaba ari Kigambo, kandi Akaba aine okwikiriza ngu eki Araagambe nikiza kubaho. Akagira ati, "Oo, mumureete hanu. Ndyahitsya hi okubagumisiririza?"

Akaba aine okwikiriza, n'amaani Ge. Ata? Akagira ati, "Tindikubaasa kukora ekintu kyona Ahabwangye." Ahabw'enki? Akeesiga eki Yaabaire ari; Akeesiga eky'okumanya ngu Akaba ari Kigambo. Kandi Akaba aine okwikiriza omuri Ruhanga, Owaamuhindwire Ekigambo. Akaba ari Ruhanga (Ekigambo), kandi kikaba kiri Omuriwe, kandi ekyo Kikamuha okwikiriza ahaw'okuba akamanya omwanya Gwe. Akamanya Eki Yaabaire ari, ahaw'okuba Ebyahandiikirwe bikaba bigizire ngu Akaba ari eki. Kandi hanu buri Kyahandiikirwe kikaba nikitaahiramu, kuhamya ngu Akaba ari eki Ebyahandiikirwe byagambire ngu Naija kuba, kandi Akamanya eki Yaabaire ari.

27 N'ahabw'ekyo, Akeesiga ekyo eki Ruhanga yaabaire Amukozire. Kandi ku Araabe yaakozire ekyo, mbwenu itwe titurikubaasa kwesiga ekyo eki Ruhanga yaatukozire nk'abaikiriza? "Obumanyiso obu buriguma nibukuratira abarikwiriza!" Akaba aine okwikiriza omu ki Yaabaire Ari. Kandi ku oraabe ori omwikiriza, oine okwikiriza omu ki ori: ori omwikiriza! Kandi ku oraabe oine okwikiriza omuri Ruhanga, Baiburi neegamba hanu omuri . . . "Emitima yaitu-emitima yaitu ku eraabe neetushinja, obwo titurikubaasa kugira okwikiriza; kwonka emitima yaitu ku eraabe etarikutushinja, obwo twine okwikiriza, twine obumanzi omu maisho ga Ruhanga." Ekyo ku oraabe nooyenda kukishoma, nikishangwa omuri Yohaana Orikwera 3:21. Ekyo Kyahandiikirwe nkihandiikire aho.

Hati mwetegyereze, Yohaana Orikwera . . . Nimmanyisa Ebaruha y'Okubanza ya Yohaana 3:21. Mwetegyereze.

. . . emitima yaitu yaaba etarikutushinja, obwo twine obumanzi omu maisho ga Ruhanga.

Kwonka obwire bwona waaba nookora ebintu ebigwire, torikubaasa kugira obumanzi omu maisho ga Ruhanga. N'ahabw'ekyo, nooreeba, noobaasa . . . nikija kwereeta kyo kyonka omanye ngu ogwire. Noija kweteera kimwe enyima okwo nk'omusiisi, ahabw'okumanya ngu ogwire. Kwonka omutima gwawe gwaba guitarikukushinja, kandi orikumanya ngu ori omwikiriza, kandi hatariho ekintu kyona ahagati yaawe na Ruhanga, noobaasa kushaba kyona eki orikwenda kandi omanye ngu noija kukiheebwa, ahabw'okuba n'Ekigambo eki waahairwe nk'oku yahairwe abeegi abo.

28 Hati, ekintu kyonka eki orikuteekwa kukora obwo, n'okugira okwikiriza omu ki ori. Gira okwikiriza omu ki Ekigambo kirikugamba ngu ori! Kandi Yesu akaba aine okwikiriza omu Kigambo kya Ruhanga, ekyagambire eki Ari, "Kikampandiikwaho." Daudi tibaramugambireho, omuri Zaaburi; na baanabi, kandi n'abandi boona Tibaramugambireho? "Niinye Mugaati gw'Amagaraa ogurikuruga omu Iguru ahari Ruhanga." Amiina! "Niinye ogwo Muti gw'Amagara omu kibanja kya Edeni. Niinye ebintu ebi byona, NIINYE MBAHO." Kandi ahawb'Okwikiriza Okuhikiriire okwo, Akamanya ngu Akaba ari Mesia oshukirweho amajuta, ngu Omwoyo wa Ruhanga akaba Amuriho. Akagira ati, "Hati, Nyowe, Ahabwangye, tinkora kintu kyona; kureka n'okwikiriza Kwangye omuri Ruhanga. Kandi Ruhanga akaba ari Omuriwe, Ekigambo ekyorekirwe. Kandi Ekigambo kya Ruhanga ku kija omuriwe, Nikyeyoreka, nk'oku ori omwikiriza. Mwareeba? Kandi omwikiriza ni "okwikiriza kwa Ruhanga okurikukorera omuriwe."

Ekyo nimukikunda? Ni-ni-ninkunda wa . . . Buzima ninkunda kwegyesa aha . . . oku . . . eki okwikiriza kuri.

29 Arikumanya Ekyo eki Yaabaire ari, hatariho okubanganisa kwona, Akamanya ngu Akaba ari Omwana wa Ruhanga. Akaba naakimanya, ahakuba Ekigambo kikaba nikikyoreka. Ekigambo kya Ruhanga kikooreka Eki Yaabaire ari. Akagira ati, "Ku Ndaabe ntakora emirimo ya Tata, obwo murekye Kuunyikiriza; kwonka ku-ku Ndaabe ntakozire emirimo egoo, Mutaanyikiriza. Kwonka ku Ndaabe ningikora, obwo mwikirize emirimo, ahakuba niyo Ekigambo ekyaraganisiibwe ekyorekirwe." Oo, kuri nimubaasa kusisiimuka ahari ekyo haza mukakitunga. Nimureeba, Ekigambo Kyo kyonka Kikamworeka, Eki Yaabaire ari. Kandi Akagira ati, "N'oha orikubaasa Kuunyomesereza ekibi?" Omu bindi bigambo, "N'oha orikubaasa Kuunyoreka ngu amagara Gangye n'emirimo Yangye tibirikuhiikiriza kimwe eki Mesia ashemereire kukora buzima?" Tihariho n'omwe owaabasize kugamba ekintu kyona; ahakuba akaba Ariwe. N'ahabw'ekyo Akaba aine okwikiriza, obwo; kandi kyona eki Yaabaire agamba, kikaba kibaho.

Reero Yaahinduka kandi yaagira ati, "Emirimo ei Nkora, naimwe muryagikora. Hatsigaire omwanya mukye, ensi okutareeba bundi; kwonka imwe muryareeba, ahawb'okuba Ndyaba ndi naimwe, nangwa n'omuriimwe. Mutaryemereza emitima eki murigamba, ahakuba tiimwe muryegambisa, ni Sho ori omuriimwe; Niwe Ogwo Origamba. Kandi Tiinye, Ni Tata Ori Omuriinye, Niwe akora emirimo." Nimureeba eki ndikumanyisa?

30 Hati, ekirkworeka Omukristaayo w'Ebyahandiikirwe, Ebigambo ebi Yesu akabigamba: "Obumanyiso obu buryaguma nibukuratira abarikwikiriza." Hati, noobaasa ota kweyeta omwikiriza, abantu, haza okeehakana Ebigambo ebyo? Noobaasa ota kweyeta omwikiriza haza hakagira ekintu kyona eki waayehakana aha Kigambo? Waareeba? Torikubaasa kukikora. Tori mwikiriza, n'ahabw'ekyo obumanyiso tiburikubaasa kukukuratira, ahawb'okuba oikiriza eki orikwenda kwikiriza reero ebisigaire Byakyo . . . tori-Torikukiikiriza. Kwonka nooteekwa kukitwara kyona, kandi Okiikirize. Kandi waikiriza buzima (kutari okwikiriza kw'okgingirira, kureka okaikiriza buzima), reero obumanyiso obu bukuratira abo abarikwikiriza.

Oo, noobaasa kugyeragyeanisa Omukristaayo wa hati n'Abakristaayo b'ebiro bya ira munonga? Oku abo beegi baabaire bagyendera omu maani g'Omwoyo, Omwoyo Orikwera arikubeebembera, kukikora. Embohe kwonka, nk'oku naakibuuriire ekiro kiri, embohe aha Kigambo n'okukunda kwa Ruhanga; akaba atarikubaasa n'okugyenda okuhitsya obu Ruhanga yaabaire amugyendesa. Tokaayenzire kureeba Ekanisa neimuka nka batyo? Neija kukikora; kugarukayo. Niki-nikiteekwa kubaho. Ekyo kihikire. Nikite- . . . Kiri omu muhanda hati, niinyikiriza.

31 Ahakuba Ekigambo kikooreka, Kikamworeka, eki Yaabaire ari; kandi Ekigambo nikyo kimwe nikitworeka. Mwareeba? "Omuntu ku araabe Nankunda, naayorobera ebiragiro Byangye. Kandi ku arikugira ngu Nankunda, haza atoorobere ebiragiro Byangye (ebyo ni byona), n'omubeihi; kandi Amazima tigari omuriwe."

Nimugira muti, "Mbweni, tindikwikiriza byona . . ." N'ahabw'ekyo mbweni, ekyo . . . ori otarikwikiriza, nikyo ekyo. Baiburi ku eraabe yaagambire etyo, ekyo nikituma kyaba ekihikire, ekyo nikimara Ebiro byona. Eki Baiburi yaagambire, nigo Mazima.

Mwetegyereze ahu Yaatugambire ati, "Ku muraagume Omuriinye, n'Ekigambo Kyangye kyaguma omuriimwe." Yohaana Orikwera 15, "Ku muraagume Omuriinye . . ." Mwareeba, gira okwikiriza Omuriwe. "Mwaguma Omuriinye, kandi n'Ekigambo Kyangye kyaguma omuriimwe, obwo mushabe kyona eki murikwenda."

32 Hati, mwareeba, Akamanya eki Yaabaire ari, n'ahabw'ekyo Akaba aine okwikiriza. Okwikiriza kukaba

nikubaasa kuzaara ahanyima y'okumanya eki Yaabaire ari. Hati, "Ku muraagume Omuriinye, n'Ekigambo Kyangye omuriimwe," obwo nimumanya eki muri. Mushabe kyona eki murikwenda, kiryabakorerwa.

Ekyo tikikaaba kirungi munonga, ekiro eki, buri omwe ku yaakwija omuri orwo runyiriri rw'ab'okushabirwa, ati, "Ndi Omukristaayo. Tihariho ekirkunshinja. Ni-nimmanya ngu omutima gwngye tigurikunshinja. Hariho ekirkungambira ngu ekiro eki nigwo muheru gw'okureeba enaku kwangye."? Ekyo . . . waikiriza, noi ja kuruga hanu hariho eki oine. N'obu waakwija okyamukiriire munonga ota, n'obu waakukora ebirikwingana ki, tikiraakore okuhitsya obu Okwikiriza Okuhikiriire okwo kuraayeyorekye kandi kukahamibwa omuriwi, nk'ekintu ekirikuhamiza kimwe. Kandi kyabaho, obwo tihariho ekirkwihaho.

33 Ku-ku oraabe obaire oine ekookoro, kandi omushaho akugambiire nyomwabazyo ngu butakabaire Orwokubanza omu kasheeshe noi ja kuba waafiire (omutima gwawe gwona, otakibaasa kwitsya, ekookoro ekuriiriire kimwe, eshagama yaawe yoona ehindukiire kimwe ekookoro, eki kiri kyona); reero Ekintu kikaija n'ekirikuhamiza kimwe eki ky'okwikiriza oku kw'amazima, Okwikiriza Okuhikiriire kukahinduka okurikwo omuriwi, okaashekyerera omushaho ogwo.

Okaaba nka Ai Eliya, obu yaagyendagyenda omu maisho g'ekyo kishushani ekirikuramibwa, kandi akagira ati, "Ahabw'enki mutarikweyongyera mukeeta munonga? Nooshusha oti aine ah'ari." Akaba naamanya eki yaabaire naaza kukora, ahabw'okuba Ruhanga akaba yaamugambiire ekyabaire nikiza kubaho. Yaagira ati, "Ka ruhanga oraagarukisemu omuriro, abe Ruhanga."

Baagira bat, "Twaikiriza ekiteeso ekyo." Reero baashuka amaizi aha matambiro. Kandi-kandi baayeshara, kandi baakora buri kimwe, reero baayeta bat, "Ai Baali! Ai Baali! Garukamu!"

34 Eliya akaguma atebeekaine nk'oku yaabaire naabaasa. Yaagira ati, "Mwetyongyere kweta munonga," ati-ati, "nooshusha oti aine ah'ari. Nooshusha-nooshusha oti agiire kushoha. Nooshusha oti hariho ekindi eki arikukora, mwareeba. Ari aheeru okwo." Baka . . . Yaabateerera enaku, ahabw'okuba akaba naamanya ngu nikiza kubaho.

Oo, yetegyereze ebintu byona ku yaabiteire omu buteeka. Akaribata yaaza aho kandi yaagira ati, "Ai Mukama Ruhanga wa Abrahamu, owa Isaaka, kandi owa Israeli!" Taramwetsire omu iziina rye rya Yakobo, "omuryangatanisa." Akamweta Israeli, "omunyiginya na Ruhanga."

"Mukama Ruhanga owa Abrahamu, owa Isaaka, kandi n'ow'ogwo Munyiginya (Yakobo), ka kimanywe eriizooba ku ndi omuheereza Waawe; kandi ku nkozire ebi, atari ahabw'okwetenga kwangye, atari ahabw'okwetuma kwangye, kureka ahabw'okuragiira Kwawe nkozire ebi; okukunda Kwawe, Wangambiire eky'okukora. Waanyorekire ngu ebintu ebi nibijja kuba hanu. Hati, amaizi naagashuka aha Itambiro. Ebintu ebi byona naabikora nk'oku Ondagiriire. Hati, ka kimanywe!" Kandi ku yaagambire ekyo, omuriro gwaruga omu iguru gwagwa. Akaba aine obwesigye ngu niguza kugwa, ahabw'okuba akaba aine ekirikuhamiza kimwe. Ahabw'enki? Ekigambo nikwo kyagambire.

35 Hati, Baiburi egi emwe niyo Kigambo kya Ruhanga. Kandi waatunga ekyo ekirikuhamiza kimwe (okwo n'Okwikiriza Okuhikiriire); ekirikuhamiza kimwe ngu okuraganisibwa oku oku Ruhanga yaahaire n'okwawe.

"Nooyehurira ota, Ow'eishe-emwe Branham, waaba oyemereire aho kandi okareeba abantu nibaija b'endimi ezitarikushushana n'ebindi? Noogira obwoba?" Ngaaha, sebo. Ngaaha, sebo. Akakigamba! Tinkagiraga bwoba, 'habw'okuba Akangambira atyo, kandi niinyikiriza ngu n'Amazima.

Ku Yaakungambira ekiro eki, kuza omu irimbo rya baapurezidenti kandi ngu nzoore omu bafu George Washington nyecakare omu kasheeshe, nkaayeta ensi yoona nti, "Mwije kandi mureebe nikikorwa." Nkaagira nti, "Mureete buri . . . mwi-mwije na buri muhakani ou murikubaasa kubona reero mubeetoorooze aho, nimusa kureeba Ekitiinisa kya Ruhanga. T'egyo ntebe hanu ahu orikubaasa kushutama kandi okaruhuuka akaire kakye; omu kaanya kakye naija kuba yaahikire hanu, ahonaaho naayeta."

36 Ekiro ekyo obu akoojo ako omuri Finland, eizooba eryo, nimmanyisa; karambiire aho kafii, kakaba kamazire ekicweka ky'eshaaha karambiire aho, kari obucwekacweka, eshagama neejwa neeruga omu maisho, enyindo n'amatu; amaguru gaako makye gahendagurikire, omuri sitokisi zaako nkye; kandi ebigyere byako birabire omuri sitokisi zaako, enkaito zaako zitariho. Nkareeba, kandi naateekateeka nti, "Aka kashemereire kuba kari akoojo ako." Naagira nti, "Waamanya, ka tureebe aha muheru gw'egyo Baiburi omunda, Ow'eishe-emwe Moore."

Tukaba twine Ow'eishe-emwe Lindsay, Ow'eishe-emwe Moore yaareebayo "Obunaku buryahika,' NIKWO MUKAMA ARIKUGIRA," (Oo, mugyenzi!) "haryabaho ekicweka ky'e-ensi ekirimu obunyaatsi bwingi bwa kijubwe oburikumera. Enkiri ziryaba zitembekyeraine hamwe. Akoojo kato kategire eishokyre rigufu, eipeesha ry'empare karitsibiire eruguru hanu, kandi ebigyere byako . . . sitokisi zaako zikurwirwe eruguru munonga. Karyaba kaine amaisho ga burawuni, garyaba gahindukire nigareeba enyima. Karyaitirwa omuri butandu ya motoka. Kwonka iwe okateho engaro, kandi karyazooka omu bafu."

37 Nkikyo Kikaba kiri aho, kihandiikirwe aho. Nkako kakaba karambiire aho, amiina, kategyereize Ekigambo kyonka. Naagira nti, "Akoojo aka ku karaabe katazookire omu dakiika nkye okuruga hati, obwo nimba ndi nabi

w'ebishuba, mumbingye omuri Finland. Kwonka ku karaazookye, mugwe ahansi mujumaire kandi mweteise!"

Naagira nti, "Rufu 'we, torikubaasa kumugumya." Nkeeta omwoyo gwako okurugiirira aha Kigambo kya Ruhanga, "Omu Iziiina rya Yesu Kristo," reero kaaguruka kaayemerera. Kihikire! Mwareeba, . . . Okwikiriza, mwareeba, kukakwata. Ruhanga akakigamba, n'ahabw'ekyo, nkikyo aho!

Hati, ogwo-ogwo ni Ruhanga orikugamba omu biro ebi okurabira omu kworekwa. Kwonka eki: kwonka kuri okworekwa okwo kwabaire nikuhakanisa Eki, okwo kukaabaire kugwire; Eki nikikira okworekwa. Okworekwa kwona ku kuraabe nikuhakanisa Ekigambo, mukurugyeho; tikuri kwa Ruhanga, Ruhanga tahakanisa Ekigambo Kye.

N'ahabw'ekyo, Ekigambo eki ku kiraabe kyakugambiire ekintu, obwo noobaasa kugira obwesigye nibwo bumwe obwo bw'ekirikuza kubaho. Tihariho ekintu, . . . Ku Kiragire kit, "Ku barita engaro aha barwaire baryakira"; mpaho, ow'eishe-emwe, okwikiriza ku, Okwikiriza Okuhikiriire okwo, kwakwata ekyo, oka . . . waija omu runyiriri oru rw'ab'okushabirwa, okaaba noogurukyera kandi nooteera akaari okuhitsya obu . . . waaheza kuruga aha oti, "Kihweire!" Kihweire! Kyona kyahwa, kihweire! Ku waakuba oine eki orikushaba omu mutima gwawe kandi okaikiriza ngu eshaara egoy obu yaashabwa ahabw'ekyo, neeza kugarukwamu, tihariho kintu kyona eki oraahaajaaneho, ekyo nikyo kirikuza kubaho; nk'oriya mukazi owaabaire arwaire ekyejwiso.

38 Yesu akaba aine Okwikiriza Okuhikiriire. A-Akaba akwine, kandi kukaija ahabw'okuba Akaba ari Kigambo. Kandi noohinduka Ekigambo; nooba Ekigambo, waaba nooyakiira Ekigambo. "Ku muraagume Omuriinye, n'Ebigambo Byangye omuriimwe. Ebigambo Byangye e . . ." (Ekigambo eki) "byaguma omuriimwe, obwo mushabe kyona eki murikwenda, kandi kiryabakorerwa." Mwareeba? "Ku murigambira orushozi oru muti, 'Tsinduka,' haza mutabanganise, kureka mukaikiriza mu ki mwagamba, obwo muryakikorerwa. Ku murishaba, mwikirize ngu ebi mwashaba mubiheirwe, kandi kwo muryabiheebwa; biryabaheebwa." Obwire, omwanya, tihariho ekindi kintu kyona ekiribaasa kukihindura. Nimumanya ngu kyakozirwe. Kyahweire-kyahweire.

39 Hati, mwetegyereze! Hati, kandi Akatugambira ati, "Ku muraagume Omuriinye n'Ekigambo Kyangye omuriimwe," Yohaana Orikwera, hanu, "nimubaasa kushaba kyona eki murikwenda, kiryabakorerwa." Bwanyima, omanye omwanya gwawe omu Byahandiikirwe, nk'omwikiriza. Mwareeba, nooteekwa kumanya omwanya gwawe, nk'oku Yaamanyire omwanya Gwe.

"Tikihandiikirwe ngu Kristo aryajia, na byona ebi Kristo arikora?" Akagambira Kuleopa n'abo akasheeshe aki ati, "Tikihandiikirwe omu Byahandiikirwe ngu barya . . . ngu Ashemereire kubonabona kandi bwanyima aitwe kandi azooky ekiro kya kashatu?" Ati, "Ahabw'enki mutarikurahuka kwetegyereza?"

Reero baateekateeka bat, "Mugyenzi, omushaija ogu emigambre ye n'ey'omutaano mukye aha y'abandi bantu." Ku baahikire omu kivorero, baamanya, ngu Niwe. Mwareeba, amaiisho gaabo gakaba gakingiirwe Ahariwe. Mwareeba, bakamanya ngu Akaguma ahamiire ahari ekyo Kyahandiikirwe, n'ahabw'ekyo bakamanya ngu Niwe.

40 Hati, nooteekwa kwikiriza eki waashaba. Ku oraabe ori omwikiriza, yemanye ku ori omwikiriza. Manya ngu ebintu ebi n'ebiyawé.

Om magara gaawe ku haraabe harimu okushinjwa, ekyo obanke okigorore. Mwareeba? Ku oraabe nooshinjwa omu . . . Ni . . . nari noobaasa kuba na Oral Roberts n'a-n'abandi bantu baingi abaine okwikiriza baije hanu kandi bakushabire, kandi bagurukyere, kandi bakushukyeho garani nyngi z'amajuta, kwonka nabwo titikiraagyende. Ekyo kihikire.

N'enki ekirikuremwa omu nteerano za Oral ahari ekyo? Nkimanyira omu runyiriri rw'ab'okushabirwa. Noohurira Omwoyo Yaagira ati, "Okashabirwa enyimaho. Omushaija oine eishokye erirkwiragura, ni nk'omushaija muhango, emishaya mihango." Ogwo ni Oral Roberts. Mwareeba? "Kandi orwo rukaba ruri orurembo nanka; orurikwetwa nanka, ekintu nanka."

"Eego, ekyo kihikire." Mwareeba?

"Omushaija nanka na nanka akakushabira." Mwareeba, nka batyo. "Kwonka hanu niho omurabanamu gwawe guri hanu." Mwareeba? "Gyenda ogorore ekyo kintu. Gyenda okwo kandi oyeteise ekyo kibi ahari baro, aha mukazi waawe. Gyenda okore ekintu eki." Tikirikugirira mugasho n'obu waakushabira oha, okuhitsya obu ekyo oraakigorore. Okucwerwa orurbanja kuri omu mutima gwawe, kandi Ruhanga tarikubaasa kwija omu mutima ogwo ogucwereirwe orurbanja. Mwareeba? Ruhanga tatuura omuri ekyo; nooteekwa kugorora. Kandi ku oraakikore, nooteekwa kugira okwikiriza. Buri kimwe kyaba kiri gye, nooteekwa kugira okwikiriza kandi okiikirize. Otatiina.

41 Omu kitabo kya Yobu, hanu Nikigira kit, "Yobu akatiina." Kandi eki yaatiinire, buzima kikabaho. Ekyakireetsire niki? Obutiini bwe. Ekyo nikyo kyatumire kyabaho. Okwikiriza kwe kukaabaire kwamukingiire kireka kumuhikaho, kwonka obwoba bwe bukatuma ya . . . bukatuma kyamuhikaho. Akaba aitsirwe obwoba ngu nikiza kubaho, kandi kyabaho. Hati, kuri-kuri yaamanyire ngu tikirikwija kubaho, kikaba kitarikwija kubaho. Nimureeba eki ndikumanyisa?

Ku oraabe oine obwoba waaba noija omu runyiriri rw'ab'okushabirwa, "Obundi tiinyine okwikiriza

okurikugasha"; tikirikwija kubaho, otafayo. Waareeba? Kwonka ku oraabe noomanya ngu nikiza kubaho, nikiza kubaho. Waareeba? Waareeba, n'ekintu ekirikuhamiza kimwe. Yobu akaba aine obwoba ngu ebintu ebi nibijia kumugwaho, kandi kyabakwo. Ku oraabe oine obwoba ngu endwara yaawe neija kukurugaho . . . nimmanyisa ngu terikwija kukurugaho, terikwija kugyenda. Ku oraabe oine okwikiriza, ngu nikiza kubakwo.

Buuza dokita weena. Ekintu ky'okubanza eki arikugyezaho kutuma waabanza kukora, n'okwesiga omubazi ogu arikukuha. Ku oraabe otagwinemu obwesigye, kikaabaire kirungi ogurekye. Waareeba? Buzima! Mbwenu ekyo niki? N'okwikiriza okurikutamba; n'okwikiriza okurikukora obwire bwona.

42 Petero, akaba naatwaza gye okuhitsya obu yaakwatsirwe obwoba. Ewigambo kikamugambira, akaba naabaasa kugyendera aha maizi. Akabanza kugira obwoba, yaateekateeka ngu n'o-n'omuzimu, reero yaagira ati, "Mukama, ku oraabe ori Iwe, ndagiira nyije aho ningyendera aha maizi."

Yaamwikiriza ati, "Ija." Hati, ekyo nikishushana na Yakobo 5:14, nikishushana na Mako 16; ni Ruhanga ogwo omwe Owaakigambire, ati, "Ija." N'ahabw'ekyo yaatandika kugyenda. Akatwaza gye, yaaruga omu bwato, yaatandika kugyendera aha . . .

Eihunga rikateera aha nyanja, nimumanya; ebingonzi by'eifuro rya mutare, by'amaani, bihangokukira obubungo bwa hanu obu, eifuro riri ahaiguru yaabyo; nibitiinisa oburengye, obundi eifuro rya fuuti ikumi na itaano, nari makumi abiri, ebingonzi nibihinduriza. Kandi ekyo kintu eki yaashabire kikaba kiri eky'akabi munonga, "Ku oraabe ori Iwe, Mukama, . . ." Mwareeba, Akaba naareebeka nk'o . . . kikareebeka nk'ekicuucu nari omuzimu. Yaagira ati, "Ku oraabe ori Iwe, ndagiira nyije ah'ori ningyendera aha maizi."

Yesu yaamugarukamu ati, "Ija."

Reero yaarugamu, yaagira ati, "Ni Mukama, naaza kufa kugyenda." Kwonka amaisho ge ku yaagataire aha bingonzi, yaatiina. N'enki ekyazire omu biteekateeko bye? Ekintu ky'okubanza, aka . . . "Naaza kugyenda ahabw'okuba Ewigambo kyangambira kugyenda." Kwonka ekyakuratsireho, akareeba e . . . mpaho, akareeba obubonero bwe; akareeba kuriya yaareeba oku ebingonzi byabaire biri bihangokukira, reero yaatiina; kandi ku yaakozire ekyo, yaatobera. Mwareeba? Eki yaatiinire, kikabaho! Eki yaikiriize, kikabaho! Ku yaikiriize ngu naabaasa kugyenda, akagyenda; ku yaikiriize. Akatiina omu kwikiriza kwe, reero obumanzi bwe bwamurugaho. Mwareeba? Akaba naakigira ngu aine okwikiriza, kwonka akaba atarikuhamiza kimwe. Okuhamiza kimwe okwo kukaagiriire kimwe ahaiguru y'ebyo bingonzi ebiriho eifuro rya mutare reero kuhika ahari Yesu, mwareeba, kuri yaabaire aine Okwikiriza Okuhikiriire. Mwareeba? Kwonka akaba atakwine. Akateekateeka ngu akwine. Akaba akwine okubanza, akaba ayeteekateekire kuruga omu bwato akagyenda ati, "Ahabw'enki, Mukama yangambira kukikora, nikiteekwa kubaho." N'ahabw'ekyo akafa kuruga omu bwato, yaatandika kugyenda. Tarateekateekire aha-aha-aha-aha bingonzi, oku byabaire nibihinduriza. Ekyo tarakiteekateekireho.

43 Hati, waatandika kuteekateeka oti, "Mpaho, hati b'orekire. Kandi, noomanya, mazire obwire burasingwa ndwaire, ni . . ." Reka! Kikaabaire kirungi ogaruka omu bwato. Mwareeba? Mwareeba? Kwonka waareka kuteekateeka ahari ekyo, . . .

"Abrahamu tarateire mutima aha mubiri gwe, hati ogufiire, nari ahari nyinenda efiire ya Saara." Tarateekateekire ahari ekyo, nari kikitaho omutima. Nangwa tarakifiireho-tarakifiireho. Nangwa tarakiteireho omutima na kakye; akata omutima ahari ekyo eki Ruhanga yaagambire, reero yaagumizamu. O-obwire bwona obu Petero yaakozire ekyo, akagyenda.

44 Kwonka Yesu akaba atwire omu nsi ei omuntu weena yaabaire atarikumanya, Akaba ari omuntu otari w'obutoosha. Akaba naatuura omu nsi y'Okwikiriza Okuhikiriire omuri Ruhanga Ohikiriire, omu Yaabaire ari. Kuri nitutuura omu Kwikiriza Okuhikiriire kw'Omukristaayo, okw'eki turi, tukaabaire abatarikwetegyerezibwa omu nsi; abantu tibakaabeetegyereize. Mukaabaire nimugyendera omu Mwoyo. Eki Omwoyo yaakugambire mukaakikozire. Eki Yaakubazibiire, timukaakikozire. Reero abantu baatandikye kugira ngu . . . kandi . . . okaabaire-omuntu otarikwetegyerezibwa aharibo.

Okwo nikwo kiri aha baikiriza boona, tibarikwetegyerezibwa. Abantu tibarikubeetegyereza, ahabw'okuba nibatuura omu nsi yaabo bonka. Yesu akaba naatuura omu nsi ei hatariho ondiijo weena owaabaire naabaasa kuhikamu. Abeegi bakaba batarikubaasa Kumwetegyerezibwa. Ku Yaabaire agamba nabo, bagamba eki. Reero baagira bat, "Ahabw'enki, No-Noogamba omu nfumu! E-eki titurikukyetegyerezibwa. Eki nikibaasika kita?" Mwareeba, bakaba batari omu nsi ei Yaabaire atwiremu. Mwareeba, bakaba batarikubaasa Kumwetegyerezibwa, tihariho n'omwe owaabaire naabaasa Kumwetegyerezibwa.

45 N'ahabw'ekyo omuntu ku abaho ahabw'okwikiriza kandi akagyenda ahabw'okwikiriza, nimmanyisa okwikiriza okurikwo, naataanisibwa n'ensi yoona kandi ahinduka ekihangirwe ekisia omuri Kristo. Aho, hati waatandika kutaaha omu bintu ebikozire Omugore. Waareeba? Waatandika kutaaha omu mbeera y'okutwarwa, hati. Ekyo nikimanyisa buri omwe omuriitwe (atari omuriisa wenka, hati), abadiikoni, ababiiki, ekyo nikimanyisa abashomi, buri omwe naatambura omu nsi na Ruhanga wenka. Noobatizibwa kutaaha omu Bukama obu, kandi omwo tiharimu omuntu weena kureka iwe na Ruhanga. Mwareeba? Naaha ebiragiro, kandi obigyenderamu. Kyona eki Araagambe, tihariho kubanganisa kwona na kakye, noogumizamu noogyenda. Mukama ku araagambe eki,

tihariho omuntu weena omu nsi orikubaasa kukikwihamu, noogumizamu noogyenda nk'obutoosha. Hati, waatandika kutaaha omu Kwikiriza Okuhikiriire, okuhikiirira okuhikiriire okutarikubaasa kuremwa. Okwikiriza okwo tikukaremwaga na kakye. Eego, Akaba atarikwetegyerezibwa aharibo ahabw'Okwikiriza Kwe Okuhikiriire; kandi na hati nikwo kiri n'abo abaine Okwikiriza Okuhikiriire, tibarikwetegyerezibwa aha bandi.

46 Twegyesiibwe "kurwanisa Sitaane, kandi naija kutuhunga." Hati, "okurwanisa" ni "okumwangira"; murwanise kwonka, ekyo ni "tambura omutsigye." Ruhanga akagamba ekintu nanka; n'obu yaakuba naagyezaho kukugambira ki, otamuhurikiza na kakye. Nooteekwa ku . . . amatu gaawe gafe aha kindi kintu kyona kureka eki Omwoyo arikugamba. Waareeba? "Ogwo oine amatu (ogwo orikuhrira), ayetegyereze eki Omwoyo arikugambira amakanisa"; ogwo oine amatu g'okuhurira, orikukwata eki Omwoyo arikugambira amakanisa. Mwareeba?

47 Eki Sitaane araagambe, "Mpaho, tindiku . . ." Ekyo tikiine kakwate n'o . . . "Mpaho, ekyo ku oraakyegyese, ekigombe ky'ediini nikija kukuta . . ." Ekyo tikiine kakwate nakyo, naagumizamu nka burijo.

"Oine amatu, ahurile eki Omwoyo arikugambira amakanisa." Noomanya, omuri Baiburi, ekyo Naaguma naakigamba. "Oine okwikiriza. Oine amatu g'okuhurira, ahurile." Mwareeba? "Orikwetegyereza, abare enamba y'enyamaishwa." Ebintu ebi byona ebitarikushushana. "Ogwo oine, akigambire abandi boona, kugira ngu bakiungye."

Kandi ekyo n'ahabw'okwikiriza okuturikugambaho hati, okwikiriza oku orikuteekwa kugira, okwo Kwikiriza Okuhikiriire; okwo Kwikiriza okurikugira ngu, "Eego!" Tihariho ekirikubaasa kugira kiti, "ngaaha" Ruhanga yaagira ati, "Eego." Mwareeba? Yaagira ati, "Eego," Ni "Eego!" Kandi tihariho ekindi kyona ekyakubaasa Kukikwihamu.

48 N'Okwikiriza Kwe Okuhikiriire, Akaba ari ow'omutaano munonga. Kandi Sitaane tarabaasize kuguma haihi Nawe obwire buraingwa munonga. Twakitunga akasheeshe aka omu ishomo. Ku yaizire n'ekyo kiteekateeko ky'ekikwangara ky'o-obwengye bwingi bw'obuntu, akaija aho n'eby'okwosyosya Yesu, kwonka yaayeshanga yaatomera ewaaya y'amashanyarazi ga voloti omutwaro: gaamuteera gaamunagira kimwe enyima ogundi murundi. Eego sebo. Reero yaagira ati, "Kikahandiikwa ngu, omuntu tatungwa by'okurya byonka!" Reero gaamuteera.

Omurundi ogwakuratsireho akaija mpura, obu yaagira ati, "Hati ori omuntu mukuru, noobaasa kweta eruguru hanu kandi obe ow'amaani."

Ati, "Garuka enyima Yangye, Sitaane." Oo, mugyenzi, eki yaabugaine! Kandi, "Otaryosa Mukama Ruhanga waawe." Mwareeba, Akeehamya We wenka ahari Sitaane ku Ni Mukama Ruhanga. "Ahakuba kikahandiikwa ngu, Otaryosa . . ."

Hati, Sitaane kuri-kuri yaabaire atarikumanya ngu ogwo akaba ari Mukama Ruhanga, akaagizire ati "Rindaho edakiika, tori Omuntu ogwo." Kwonka akaba naamanya okukiraho obwire obwo Kutamuteeza empaka.

Akaba naamanya ahu Ayemereire. Akagira ati, "Otaryosa Mukama Ruhanga waawe." Kandi ekyo nikyo Yaabaire ari. N'ahabw'ekyo Sitaane akaba naamanya okukiraho ekyo kutakigamba, ahabw'okuba emirimo ya Yesu ekaba yaaherize kuhamya ngu Akaba ari Mukama Ruhanga waawe.

49 Yetegyereze! Hati Yetegyereze. Okwikiriza Okuhikiriire nikutegyeka embeera zonna. Okwikiriza Okuhikiriire nikutegyeka embeera zonna. N'obu embeera yaakuba eri eta, Nikugitegyeka. Hati, reeba! Ku orikwikiriza ekintu kyona, okakora ekintu kyona, kandi oine okwikiriza omu ki orikukora; n'obu embeera yaakuba eri eta, ekyo tikiine kakwate nakwo. Mwareeba, nikutegyeka embeera egyo. N'obu haakuba omu-omu kishengye ky'abarwaire, kandi Mukama yaaherize kushuuura ngu ekintu nanka eki nikiza kubaho, iwe kigambe kwonka haza ogumizemu noogyenda.

"Oo, eki . . .?" Otabuuza ekibuuzo kyona. Kyahweire, gumizamu noogyenda. Mwareeba? Nikutegyeka embeera zonna. "Mbwenu, ku oraakore eki, Nanka na nanka nibaza kukora . . ." Ekyo . . . mwareeba, Kwaherize kukitegyeka. Mwareeba?

Okwikiriza nikwikiriza ngu Ruhanga naija kukikora. "Tindikumanya oku Arikuz arikuza kukikora, kwonka Naija kukikora oku kiri kwona." Mwareeba? Nikutegyeka embeera zonna.

Kandi okwikiriza na rukundo biine obuzaare, ahabw'okuba torikubaasa kugira okwikiriza otaine rukundo, ahabw'okuba okwikiriza kwawe kuri omuri Ruhanga Ou rukundo ekomookaho. Okwikiriza na rukundo nibikora hamwe.

50 Buzima, nk'omutsigazi n'empangare abakundaine. Twara eky'okureeberaho ky'omutsigazi n'empangare, kandi bakakunda . . . bakakundana. Kandi ku barikugumizamu kandi omwe yaatandika kwetegyereza mugyenzi we, emitima yaabo etandika kuba nk'omutima gumwe. Mwareeba? Tiba-tiba . . . kwonka nabwo tibakabaire omwami n'omukyara, kwonka rukundo yaabo neebabumbira hamwe, kandi nibeessigana. Hati, ku baraabe nibakundana buzima, rukundo yonyini, kandi orikumanya ngu empangare egi neekukunda kandi-kandi nayo erikumanya ngu noogikunda, oine obwesigye (omwe aine okwikiriza omuri mugyenzi we) ku muraabe nimwesigana; kyaba kitari

kityo, kikaabaire kirungi mutataasyana. Mwareeba?

Yetegyereze, nooteekwa kugira okwikiriza. Kandi waabataanuura haza omwe okamuta hare munonga omu mashuumaa n'ondijo okamuta hare munonga omu matemba, nibaba nibakikundana, n'obu baakuba bari nkahi. Nibaba nibakyesigana nk'oku barikubaasa, ahabw'okuba nibakundana. Kandi ku oraabe nookunda Mukama, kutari okweshara gehena, kureka orikukunda Mukama, obwo oine okwikiriza omuri Ruhanga; waareeba, ku oraabe Noomukunda.

51 Nk'e-nk'empangare . . . kiheruukire kubaho hanu omuri Louiville, enshumi nkye ehweire. Omukazi, akaba a-akaba a . . . amazire emyaka minge ari Omukristaayo, kwonka iba niho yaabaire aherize . . . yaakunda, yaakunda omushaija ogu. Omushaija ogu akaba amazire emyaka mikye, ari Omukristaayo. N'ahabw'ekyo baataasyana; bakaba nibakundana kandi nibeesigana, n'ahabw'ekyo baagaitwa. N'ahabw'ekyo omukazi ogu yaagambira iba, ati "Ibanye, nooteekwa kuba noogumirwa, ori Omukristaayo muto. Orabire omuri bingi." Kukaaba kuri okunywa; eki kyabaire kiri. Ati, "Orabire omuri bingi." Kandi yaagira ati, "Nimmanya ngu nooteekwa kwohibwa munonga munonga." Kandi yaagira ati, "Niinyenda ngu hati omanyekintu kimwe. Hati, ku kyakubaho okagwa, ku kyakubaho o-okagwa omu kwohibwa kandi okasingurwa, otogumayo; ogarukye omuka. Oizire kimwe hanu, 'habw'okuba ni-niinyija kuba ndi hanu hanu nkutegyereize, kandi niinyija kukuyamba tushabe ogundi murundi okuhitsya obu oraasingure. Niinyija kuguma naiwe, ahabw'okuba ku wantaahize, nkaikiriza ngu ontaasye ahabw'okuba nkaba ninkukunda. Kandi n'obu waakukora ki, nabwo ninkukunda."

Ahanyima y'ebiro bikye, akaba naarya kyamushana na bagyenzi be eifo okwo omu kishengye ky'okuteekyeramu, akaba naakibagambiraho, ati, "Hati, omushaija akaabaasa ata kukora ekintu ekigwire kunu hariho orikukukunda batyo?" Mwareeba?

Nikyo ekkyo. Noobaasa ota-ota kushiisha obwesigye obwo?

52 Kandi ku twabaire turi abanyabibi, tutaanisiibwe, tutaine Ruhanga; omu nsi, omu shaabo y'ebondo, nk'oku naakyeta akasheeshe aka, Ruhanga akaija ahi turi! Ruhanga akakusherura, tiiwe waasherwire Ruhanga. "Tihariho orikubaasa kwija Ahariinye Tata yaaba atabandize yaamwiriza hahi." N'ahabw'ekyo Ruhanga akaija omuri ebyo byondo, eki waabaire ori, yaakusherura yaakwhayao kandi yaakutemaho yaakwhayao! Ekyo kishemereire kuhanga Rukundo Ehikiriire. Reeba oku waabaire ori, kandi oreebe oku ori. N'enki ekyakozire ekkyo? Omuntu owaabaire naakukunda! Mbwenu, ahabw'enki otogira okwikiriza omuri ekkyo eki Yaakuraganiise? Rukundo ehikire y'amazima neehanga obwesingye omu Kigambo Kye.

53 Akanshanga ntari kintu. Na hati tindi kintu, kwonka ndi omu mukono Gwe. Mwareeba, Akanyihayo. Kandi Yankunda obu naabaire ntarikukundwa. Akakukunda obu waabaire otarikukundwa, kwonka Akakuhindura. Nk'oku Ow'eishe-emwekazi omwiraguju yaagambire, obunaku buri omu bujurizi bwe, akagira ati, "Tindi-tindi nk'oku nschemereire kuba ndi, kandi tindi eki ndikwenda ngu mbe, kandi nabwo tindi nk'oku naabaire ndi!" Akamanya ngu haine ahu yaabaire arugire, hariho ekintu ekyabaire kibaireho. Kandi okwo nikwo kiri. Kuri Ruhanga, obu naabaire ntaanisiibwe Nawe, Akankunda munonga okuhitsya obu Yainamire ahansi akanjandura, ekkyo nikimpamiza ngu Naayenda kunkozesa. Aine ekigyendererwa omu kukikora. Hariho eki Yaareebire omuriinye. Hariho eki Yaareebire omuriyiwe. Akaba aine ekigyendererwa ky'okukujuna, reeba abantu abatajunirwe ebiro ebi. Reeba zaamiriyoni ezi Yaakubaire Yaabaasize kujuna omu mwanya gwawe, kwonka Akajuna iwe. Amiina! Tihariho orikubaasa kuza omu mwanya gwawe. Amiina! Ori omuri puraani ya Ruhanga. Tihariho orikubaasa kukikora. Egyo ni rukundo Ye ahariyiwe.

Mbwenu, rukundo yaawe Temugarukira? Bwanyima hakabaho okukundana. N'obu embeera yaakuba eri eta, egoy mbeera neetegyekwa Rukundo egi erikuuhanga Okwikiriza: ngu Ruhanga naakukunda kandi naiwe nookunda Ruhanga, kandi nimukundana, kandi-kandi ekkyo nikireeta Okwikiriza okwo. Ni kirungi. N'ahabw'ekyo tikirikubaasa . . . kwonka tikirikubaasa kureeta ekkyo kyonyini eki Ruhanga yaraganiise ngu kuryakora.

54 Hati, mwetegyereze! Okwikiriza Okuhikiriire kushemeire, nk'oku rukundo eshemeire. Mwareeba? Hati, waaba nookunda omuntu, kandi oine . . . waaba nookunda baro nari nookunda omukazi waawe. Hati, tikirikwetaagisa omuntu kukugambira ngu "torikumukunda," ahabw'okuba noomukunda, kandi nookimanya ngu noomukunda.

Hati, ku naakukubuuza nti, "Noobaasa-noobaasa kukyoreka ota?"

"Oo, ninkyoreka omu buryo obu ndikutuura nawe." Mwareeba? "Ndi omukazi w'amazima, omwesigwa. Ndi omushaija w'amazima, omwesigwa aha mukazi wangye, kandi ekkyo nikinyoreka ngu ni-ninkunda omukazi wangye; nari ngu ninkunda ibanye." Nooreeba, amagara gaawe nigooreka eki ori. Ekintu nikyo kimwe eki Obukristaayo bukora. Mwareeba? Okwikiriza kwawe, nimwesigana, okushemeire. Kandi hariho ekintu ekirikyo, eki otarikubaasa kworeka ondijo weena, kwonka nabwo okiine, kandi ebi orikukora nibikyoreka.

55 Kandi ku oraabe oine Okwikiriza okushemeire, okutafungwire, nk'oku orikukunda mugyenzi waawe, obwo ekkyo nookyoreka omu buryo obu orikutwazamu. Tokyetomboita bundi, noomanya ngu kyaherize kukorwa, noogumizamu noogyenda. N'obu ebintu byakuba nibishushana bita, eki ondijo weena yaakugamba, noomanya ekibaireho. Noomanya ngu kihweire; nk'oku orikumanya ngu nookunda baro, nk'oku orikumanya ngu nookunda . . . Mwareeba, rukundo n'okwikiriza nibiteekwa kugyenda hamwe. Biine obuzaare, nibikundana. Rukundo neezaara

Okwikiriza.

56 Sitaane ku arikutwasya, tushemereire kumurwanisa n'Okwikiriza Okuhikiriire omu Kigambo Ekihikiriire, nk'oku Yesu yaakozire. Ekigambo kya Ruhanga Kihikiriire. Tushemereire kugira Okwikiriza Okuhikiriire omu Kigambo eki Ekihikiriire, reero turwanise Sitaane.

Hati ka turahutsyeho, jubajuba nk'oku turikubaasa.

Ahabw'Okwikiriza Kwe omu-omu Kigambo Kye itwe (We naasingura), nitubaasa kusingura ekintu kyona: byona okufa, okuzimu, n'ekituarto. Nitumanya ngu Ruhanga ni Ruhanga, okwo Kwikiriza Okuhikiriire omu Kigambo kya Ruhanga Ekihikiriire, Akasingura buri kintu kyona eki Yaabaire abugana. Okufa kukaba kutarikubaasa n'okwemerera Omu maisho Ge. Endwara zikaba zitarikubaasa kwemerera Omu maisho Ge. Omuriwe hakaba niharugamu amaani agarikushusha emigyera erikuhimintika, nigahimintika obwire bwona, amaani nigaruga omu kijwaro Kye. Abantu aba, kuza ahansi y'ekicucu, kufa kuta orukumu rwabo aha kijwaro Kye kandi baakira. Ogwo mukazi ku yaakozire ekyo, buri omwe akaba naayenda kukora aha kijwaro Kye, ahabw'okuba bakamanya ngu Omuriwe hakaba niharugamu amaani obwire bwona, nigahimintika nk'emigyera. Ngugwo Akaba ari aho, naagyenda, naagyenda omu nsi n'Okwikiriza Okuhikiriire, ahabw'okuba Akaba ari Kigambo.

Mbwenu hati, "Ku muraagume Omuriinye," okurabira Omuriwe, Akabareetera Ekigambo; "n'Ebigambo Byangye byaguma omuriimwe," reero mugyendere omu muhanda ogwo: amaani nigahimintika nigakurugamu, emigyera y'enshuro z'emigisha ya Ruhanga neehimintika neeza omu bantu. Mwareeba eki ndikumanyisa? Kandi torikukigingirira, torikukiteekateeka. Kiriyo nikibaho buzima, kandi nookireeba. Ku oraabe nookiteekateekaho kwonka, ekyo tikirikubaasa kugira omugasho gwona; kwonka buzima ku kiraabe kiriho, buzima kyaherize kubaho.

57 Hati mwetegyereze! Mureebe, Ahabwakwo, ku Yaayemereire kandi akagira ati, "Ku muraasheeny Omubiri ogu (Hekalu egi), Naanye Ndyagiimutsya omu biro bishatu." Ahabw'enki? Akaba amazirwe ngu ekyo Naija kukikora, ahabw'okuba Ebyahandiikirwe bikagira ngu Aryakikora (Mesia): "Tinditsiga magara Ge kuzimu, n'obu kwakuba okureka Orikwera Wangye kujunda." Nabi, ou Ekigambo kijaho, akaba yaagambire ngu ekyo kiryabaho, kandi Akamanya ngu Akaba ari Omuntu ogwo.

Kandi ku e . . . Yesu, We wenka, akagira ati, "Okushaba okurimu okwikiriza kuryakiza ogwo orwaire," nimmanyisa, "Baryata engaro aha barwaire, kandi baryakira." Ku . . .

Nooteekwa kugira obwesigye obuhikiriire obwo nibwo bumwe ngu "ku baranteho engaro, niinyija kukira," 'habw'okuba nikwo Yaagambire.

Akagira ati, "Musheeny Omubiri Ogu, Naanye Niinyija Kugwimutsya." 'habw'okuba Akamanya ku ari Mesia. "Tindireka Orikwera Wangye kujunda"; Akamanya ngu Niwe Orikwera. "N'obu kwakuba okureka amagara Ge kuzimu"; Tarakikozire. Akamanya ngu Naija kukikora. Akaba naayesiga ngu Akaba ariho kusingura byombi okufa n'okuzimu, ati, "Mugisheeny, ku muraabe nimwenda, kandi Niinyija kugaruka Ngiiimutsye omu biro bishatu." Oo, mugyenzi! "Nyine obushoboorozi bw'okuhayo amagara Gangye, kandi n'obw'okugeegarurira." Akeemanya eki Yaabaire ari.

58 Ori Omukristaayo. Oine obugabe ahari buri mugisha gw'obucunguzi ogu Yesu yaafeereire ahabwawe. Yoona n'eyaawe! Emigisha yaaherize kushashurirwa, nooteekwa kukiikiriza kwonka. Ti kukiteekateekaho; kureka kukiikiriza, kandi okamanya ngu n'ogwawe, kandi noobaasa kugutunga. Oo, okwo n'Okwikiriza okurikusingura: manya! . . . ? . . .

Akamanya kare ngu nikiza kubaho. Akaba naabaasa kuranga ngu nikiza kubaho, ahabw'okuba Akaba naamanya ngu nikiza kubaho; kandi kyona eki yaarangire, kikabaho. Hati, yetegyereze! Kyona eki Yaabaire agamba, Ruhanga akaba aha ekitiinisa eki Yaabaire agamba. Kiteekateekyeho! Kyona eki Yesu yaabaire agamba, Ruhanga Akaba akihikiiriza. N'ahabw'ekyo, Akaba naamanya ngu Ebigambo Bye bikaba biri Ebigambo bya Ruhanga. Hati, reeba! Ekyahandiikirwe ekyo kyonyini nikigaruka kitutaahiramu kimwe ogundi murundi, "Ku murigambira orushozi oru." Oo, mugyenzi! Na-naareka ekyo ngu kitaahemu kakye kwonka, mwareeba, 'habw'okuba twaza kugiraho orunyiriri rw'ab'okushabirwa. Nituza kusiibura abateeraine reero tushabire abarwaire, abo abarikwenda ku . . . abarikwenda kugyenda.

59 Reeba! Akaba naamanya ngu Naashemeza Ruhanga. Akamanya ngu omu magara Ge hakaba hatarimu nshobe. Ruhanga akaba yaaherize kujurira ngu, "Ogu n'Omwana Wangye Ou Nkunda kandi Ou Nshemerererwa munonga, Mumuhurire! Ogu n'Omwana Wangye Ou nkunda Kutuuruamu," aha izooba eri Yaabatizibwa. "Ninshemerererwa kutuura hanu, taine Kirikumushinja."

Hati, Ruhanga ogwo ku arikwija ahariiwe, kandi akashemerererwa kukutuuruamu, akashemerererwa kuha ekitiinisa ebigambo byawe, eki waacwamu eki kiri, . . . eki Yoshua yaacwiremu niki? "Iwe izooba 'we, yemerera!" Kandi ryayemerera aho. Amiina! Buzima! Okuewamu kwa Musa kukaba kuri kuuha? Akabanga enkonu ye ahaiguru y'o-y'omugyera nka batyo, bwanyima yaaguragiira ati "Iguka!" Kandi gwaiguka! Mwareeba, ni kyona eki oraashabe. "Kandi ku origambira orushozi oru oti, 'Tsiduka,' haza otarikubanganisa, waareeba, mu mutima gwawe, kureka okaikiriza ngu eki waagamba nikija kubakwo, oryakikorera." Ekyo nikikuta enyima omu Kigambo. Hati, ago ti mate g'amacunda. Nikikuta enyima. Nimmanya ngu nikiza kugurukira aha rubaju, kikurabe

ahaiguru, obwo, nooreeba, ahabw'okuba Tikikaahama. Kwonka, okwikiriza kwonyini buzima ekyo nikukikwata, hati hati.

60 Nkakireeba, munywani. Egi ni Baiburi ebikwirwe omu maisho gangye. Nkakireeba nikibaho, n'ahabw'ekyo nimmanya ngu n'Amazima. Nimmanya, Ruhanga w'omu Iguru naamanya, ku obundi ntaraaheze obutumwa obu nkiri ohuriire, kwonka ni-nimmanya ngu kikabaho. Nkakyereebera nyenka. Ndi kareebi w'ekyo Kyahandiikirwe kirikuhikiirira, n'ahabw'ekyo nimmanya ngu n'Amazima: kukigamba, reero okeemerera aho kandi okareeba Nyamuhanga naahanga ekiine amagara kikabaho, aho omu maisho gaawe; okaguma noozunguza omutwe gwawe kandi nootangaara; reero okareeba oku n'oku haza Okamureeba naareeta ekindi, ekirikushushanira kimwe na kiri, ahabw'okuba waakigamba; kandi okarugayo okagira oti, "Hariya nihaija kubaho ekindi," reero okareeba, kandi nkikyo aho! Hati, ago n'amazima.

61 Oo, tukaabaire turahi? Hariho Okwikiriza Okuhikiriire. Hataraho okworekwa, "Gamba Ekigambo kwonka," ntakareebire kaamugye yoona. Akagamba Ekyahandiikirwe eki kwonka, eki kyabaire kiri, reero "Kigambe, kandi otakibanganisa; kandi eki oraagambe, nikiza kubaho." Kandi nkaikiriza Ekigambo kya Ruhanga, reero kyabaho. Ekyo kihikire. Ekyo kiine amaani nk'e . . . Kandi munywani, nk'omuriisa waanyu, ekyo kiine amaani nk'obu Joshua yaayemereza izooba; ahabw'okuba izooba rikaba rishangirwe ririho, eby'obuhangwa bikaba nibigyenda omu maisho, kwonka yaayemereza okwo kugyenda. Kwonka eki, Akareeta ekintu ekyabaire kitariho, Akahanga! Nshemereirwe munonga kukwatanisa na Ruhanga orikubaasa kukwata omucucu gw'ensi, eizooba rimwe, hataraho ekindi kyona, reero akanyeta nkagaruka nkaba ohuriire naaheza kuteebwa omu kituuro. Oo, mugyenzi! Nkikyo aho.

Okwikiriza kwangye Niiwe ou kuhangire amaisho,

Iwe Mwana gw'Entaama gwa Karuvariyo,

Waakigamba hazza otabanganise, kandi okaikiriza eki waaheza kugamba, oryakorerwa eki waagamba. Mwareeba, ikiriza ngu nikiza kubaho!

62 Daudi, omuri Zaaburi, Akamugambaho. Kandi aine okwikiriza, Akakozesa amaani Ge reero Yaaheereza abandi. Tikugira ngu Akageegumiza wenka, kureka Akagakozesa kuheereza abandi; kandi yaajuna abandi, yaabajunira kimwe, kandi Naabaasa kukora ekintu nikyo kimwe hati. Kandi akaraganisa okwikiriza nikwo kumwe aha baikiriza, omu Kigambo Kye, kandi Yohaana . . . nka Yohaana 14:12, nikwo Yaagambire; Mako 16; hamwe na Mako 11:23, ahu twaheza kushoma.

63 Hati, yetegyereze. Hati, Atubonekyeire omu nshusha niyo emwe ei Yaabeeeyorekyeiremu omu Ndagaano eya Ira, kandi niyo emwe ei Yaabeeeyorekyeiremu n'omu Ndagaano Ensy; kandi ayorekire okurabira omu Kigambo nikyo kimwe, Kristo niwe omwe. Kandi nimbagambira ngu Kristo niwe Mwoyo Orikwera. E-Ekigambo Kristo nikimanyisa "oshukirweho amajuta"; omuntu oshukirweho amajuta, ogwo niwe Kristo, oshukirweho amajuta. Nibangahi abarikumanya ngu ekyo n'amazima? Okwo nikwo kushobo- . . . Ogwo oshukirweho amajuta, hakaba nihaza kubaho omushaija oshukirweho amajuta. Ashukweho amajuta g'enki? Omu Byakozirwe 2, Baiburi neegira ngu Yesu owa Nazareesi, omuntu ou Ruhanga yaahamize, ashukirweho Omwoyo Orikwera; akagyendagyenda naakora emirimo mikuru n'ebintu, mwareeba, ebi Ruhanga yaayorekire, bikahamya ngu Akaba ari omu mushaija ogu.

64 Kandi hati, nitushukwaho Omwoyo ogwo omwe, baamesia abashukirweho amajuta; baamesia b'ebiro by'aha mperu, kworeka okuzooka kwa Yesu Kristo; kworeka ngu Tafiire, kureka omu buryo bw'Omwoyo Orikwera, Ari omu bantu Be; naagyendagyenda omu Mugore We, n'ekikorwa kya rukundo aha Mugore, Naamweshukamu, We wenka. Nibahinduka omwe ahabw'Obugyenyi bw'okugaitwa bwa Kyakiro; hamwe n'obumanyiso nibwo bumwe, obwaraganisiibwe Ruhanga niwe omwe, omu Kigambo nikyo kimwe, nibworeka okweforeka Kwe nikwo kumwe.

Titwine eki tutsgaize kukora kyona kureka Kukiikiriza, kandi "kukiikiriza" n'ekintu ekirikyo, kandi ekyo nikhanga Okwikiriza Okuhikiriire. Teekateeka kwonka oku-oku tutataireho omutima; ekyo kiteekateekyeho kwonka ahabw'edakiika, hati.

65 Hati, ka tureebe. Akozire ebintu byona kurungi? Araatugambiire ekintu kyona, haza kyaremwa kubaho buzima nk'oku Akigambire? Takozire, kandi Enyomyo y'Omuriro y'amaani tetwire omuriitwe kandi tekozire buzima ekyo kyonyini eki Yaaraganiise kukora? Titugireebire? Sayansa Tegitaire ekishushani, ahanyima y'okuhanuura ekyabaire nikiza kubaho; kugirayo kimwe kandi kikaza n'omu mahurire n'obutabo bw'amakuru, kikahandiikwamu kandi kikoorekwa, ahanyima y'okukibagambira ameezi maingi kitakabaireho? Takozire buzima nk'oku Yaakozire omu Ndagaano eya Ira n'Ensy? Kandi Niwe ogwo omwe buzima! Omwoyo Orikwera ogwo naija, kandi Niwe ocaaka; kandi Ekigambo kya Ruhanga, kiine amagara n'amaani okukira rurara yoona ey'amoogi abiri, nikirahuka kucaaka ebi omuntu arikuteekateeka n'ebi amaririire omu mutima gwe kukora. Ekyo kihikire? Ruhanga ogwo tiwe omwe ori? Kandi omwe Ogwo, ti munyeihanga ori okwo hare, Ari hanu. Ari hanu, eki naakikora kuhanga Okwikiriza Okuhikiriire. Nimmanya ngu Ari hanu hati. Nimmanya ngu Omwoyo We ari hanu. Nimmanya ngu Naamanya ebintu byona. Amiina! Kandi nimmanya ngu Naayenda ku-kukora ekintu. Atwire naakora ekintu, ku-kuhanga okwikiriza oku okuhikiriire omu bantu.

66 Nituza kuribata tutaahe omu Butahwaho, nk'oku kyabaire omu biro bya Noa, obu abantu munaana baajunwa? Nituza kurugayo nka Looti, na bashatu okuruga omuri Sodomu? Nituza kwija, nk'omu biro bya Yohaana Omubatizi, n'abaikiriza mukaaga? Ka twikirize, ahakuba emirimo Ye ehikiriire! Neeyorekwa buriirooba kandi ehikiriire omu maisho gaitu, erikworeka ngu We ni Kigambo, Ekigambo! Abaheburaayo, eshuura ya 4, nikwo harikugira.

... ekigambo kya Ruhanga . . . kiine obwigi bwingi okukira rurara yoona ey'amoogi abiri, . . . kirahuka kucaaka ebi omuntu arikuteekateeka n'ebi amaririire omu mutima gwe kukora.

Ekyo kiteekateekyeho! Ekigambo kya Ruhanga nikyo Ekyo, nikicaaka ebi omuntu amaririire omu mutima gwe kukora. Ahakuba Ekigambo kya Ruhanga kiine amagara n'amaani kandi kiine obwogi bwingi okukira rurara yoona ey'amoogi abiri, nikicumita kihika ahu kitaanisiza amagara n'omwoyo, n'engingo n'omushokooro, kandi kirahuka kucaaka ebi omuntu arikuteekateeka n'ebi amaririire omu mutima gwe kukora. Ekigambo kuba omuntu! Haleluya! Ekigambo kukorera omu muntu, nikirabira omu bumanyiso oburikureebwa, nikirabira omu bumanyiso oburiho buzima, nikirabira omu bumanyiso bw'Ebyahandiikirwe, buzima kwo, kukureetera Okwikiriza Okuhikiriire ahabw'Okutwarwa Okuhikiriire.

67 Ahabw'enki Tutarikukireeba? Ti kintu ekigunzirwe; Sitaane ataire omu maisho gaawe ebintu byona ebiri omu nsi, kugyezaho kukuzibira, kutuma wa . . . kutuma waaremwa Kukiikiriza. Naija kureeta omu ruteerano kandi agyezeho kunaga omu maisho gaawe buri kimwe eki arikubaasa. Kizunguze okinage hare naiwe! Baiburi neegira ngu, "Imuka kandi oyekunkumure." Yeshune.

Omwoyo We ari hanu, Naakumanya. Hariho ekintu kimwe eki oshemereire kukora, kandi ekyo n'Okukiikiriza, Kukyakiira. Naamanya. Ekyo nookiikiriza? Naamanya ekiri omuriwe, Naamanya eki ori, Naamanya ekyetengo kyawe, Naamanya eki orikwetenga.

Jim, noikiriza ngu Naamanya eby'ogwo mwereere? Waapimire omushwijo gwe otakarugireyo, obutagatsi oburikwingana igana na itaano. Noikiriza ngu Naija kumukiza? Akwatsirwe, eriizooba, yaarwara. Nigwija kumurugaho. Naareeba seeri kuriya kandi naabareeba batakarugire omuka, eki bakozire. Hati, ago n'amazima.

68 Muky. Little, noikiriza ngu Ruhanga naabaasa kukuha obusinguzi aha ndwara ya sukaari egyo? Aha rubaju rwawe hashutamiho omukazi, tarikukumanya, kwonka Omwoyo amuriho. Eki ayemerereize omutima ni kakye . . . aine omwana oine eriisho ry'okushemeza nari ekindi kintu . . . Naaruga Chicago. "Kiine amagara, n'amaani maingi munonga, okukira rurara yoona ey'amoogi abiri; nikicaaka." Niki? N'Ekigambo! Ekyo nookiikiriza? Buzima.

Hariho omukazi oshutami omu runyiriri orurukurataho hari; oherize kushemezibwa eriisho, tibyagyenda gye. Kwonka Ki-Kiikirize, nikiza . . . n'o-n'oija kuba gye. Nookiikiriza? Kare. No . . .? . . . Naateekateeka ahari ekyo.

Muky. Peckenpough, t'ahabwawe, n'ahabw'ogu mwijukuru w'omwojo oshutami hanu. Noomushabira, kwonka noikiriza ngu Ruhanga naija kumukiza? Noikiriza ngu Ruhanga naabaasa kungambira ekimushobireho? Abashaho tibaamanyire; ngaaha. Ekyo kihikire. Ebihaha bizimbire. Ekyo kihikire. Aine ekizibu omu shagama. Kihikire! Ori nk'oshobeirwe yaaba oraamurekye akaza ha ishomero nari ngaaha. "Kiine amagara, n'amaani maingi munonga, okukira rurara yoona ey'amoogi abiri."

69 Nindeeba omukazi naaremwa kurya eby'okurya bye. Haine ah'ari, ka ndeebe aha buso bwe ahantu nanka. Eego, ashutami enyima kuri. Eziina rye ni Muky. LewEllen. Ku oraikirize n'omutima gwe gwona, egyo ndwara y'omunda neija kukurugaho. Amiina!

Hanu hariho omukazi oshutami ahashungaine nawe, ompangire amaisho hati hati, ashutami aha muheru; ajwaire gaarubindi. Aine endwara y'amahenengye. Eri omu mukono gwawa gwa bumoshio; niho ebaire eri, hati teriho. Ku oraikirize kwonka!

Kandi shi omwana muto ogwo, ori enyima aho? Yaaruga Ohio; aine ekookoro omu riisho. Noikiriza ngu Ruhanga naija kurikiza? Naija kukikora, ku oraikirize. Ashland, Ohio! Ikiriza hati ngu Ruhanga naija kuritambira, kandi Naija kukikora. Niki? "Kiine amaani maingi munonga, amagara okukira . . . yoona."

Hanu hashutamiho naasi mukye, ekintu kikamateera, aine oburwaire omu ibega rye. Ekyo kihikire. Nikwo? Ni kirungi, Kiikirize, reero nikija kugyenda. Waareeba? "Ekigambo kya Ruhanga, kirahuka kucaaka ebi omuntu arikuteekateeka n'ebi amaririire omu mutima gwe kukora."

70 Hati, omu kyombeko eki tiharimu kaada z'ab'okushabirwa. Tihariho omuntu w'okushaba . . . kugaba kaada yoona y'ab'okushabirwa. Tituzikozesa hanu, ekyo n'okugira ngu abantu bagume omu buteeka. Nooyenda kushabirwa? Nibangahi abarikwenda kushabirwa Ekigambo kyaba nikyeyorekyera omu muntu? Reka ab'omu runyiriri oru hanu baimukye kandi bareetwe orubaju oru, bareetwe omu kahanda ka rwagati y'entebe eifo hanu okubanza, hanu honyini, imwe abarikwenda kushabirwa. Bwanyima, ahanyima y'ekyo, niinyenda abari omu kahanda ka rwagati y'entebe hanu kwija enyima yaabo. Reero ku baraaheze kurabaho, reka abari omu kahanda ka rwagati y'entebe orubaju oru bajie.

"Kiine amagara, amaani maingi munonga okukira, . . ." Rurara y'amoogi abiri ekyo neebaasa kukikora?

Ngaaha, sebo! Kwonka Ekigambo kya Ruhanga nikibaasa kukikora. Ahabw'enki? N'Ekigambo kya Ruhanga. Hati, nookiikiriza?

Omufumu Omukuru! Ow'eishe-emwekazi okuruga eifo okwo omuri-omuri Tennessee, Ow'eishe-emwekazi Ungren . . . Downing? Omufumu Omukuru hati ari haihi.

Ekyo tindikyebwa, omuri Fort Wayne ekiro ekyo obu ogwo mwishiki muto wa Amish nari Dunkard owaabaire ashutami aho, naateera ekyo kyeshongoro, "Omufumu Omukuru hati ari hanu," ku yaahuriire ngu ako koojo kaakira, akaimuka, Omwoyo Orikwera yaamwijaho, eishokye rye rirungi ryagwa aha mabega ge, kwonka piyano yaagumizamu neeteera. "Omufumu Omukuru hati ari haihi, Yesu omusaasizi." Amaani agarengire eby'obuhangwa gariyo nigakozesa amapeesha g'egyo piyano, neeteera "Omufumu omukuru hati ari haihi."

71 Reeba, mu . . . Noikiriza? Oshemereire? Hati oijukye, ku oraarabe . . . Hati, ku oraabe otarikukiikiriza, otaija, oshutame ahansi. Gira oti, "Naaza ku . . . ndi omwana orikukiikiriza. Naija kukiikiriza." Ku nda . . .

Baiburi neegira eti, "Obumanyiso oburiguma nibukuratira abarikwikiriza n'obu. Ku barita engaro aha barwaire, baryakira." Ekyo kihikiire kimwe. Hati, ekyo nikikora engyenderwaho zaakuratirwa, "ku Oraakiikirize." Hati, Eki ninkiikiriza. Ruhanga akikuhamiize, Ninkiikiriza. Waareeba? Naahamya Ekigambo Kye, kworeka ngu n'Ekigambo Kye. Ekyahandiikirwe kuhikiirira, kuhamya ngu nikyo. Hati, kiikirize waaba noorabaho. Nooza kukikora? Reero ku ndaakuteho engaro, . . . ekyo buzima nikyo Baiburi yaagambire.

72 Hanu oineho amajuta g'okushukaho, Ow'eishe-emwe Neville? Gareete, reero oije orubaju oru, k'eki kihikiirize Ebyahandiikirwe. Ija orubaju oru hanu, kandi osiigye amajuta buri omwe baaba nibarabaho. Hati, kugira ngu mpamize kimwe, kugira ngu nshabire buri omwe eshaara y'okwikiriza, ka buri omwe ate engaro ze ahari mugyenzi we ori omwikiriza. Gorora omukono gwawe, kandi murabanisemu emikono yaanyu buri omwe agute ahari mugyenzi we. Hanu niho twaza kwetegyereza ekintu omu dakiika nkye.

Naaza kureeba oku ekanisa yangye ekuzire, omuri ekyo eki turikwikirizamu; ndeebe oku abantu bakuzire; oku beeteekateekire kukwata Rurara kandi bakashohora bakaza omu runyiriri rw'omu maisho omu rugamba, bakagira bat, "Ninkuhiga, Sitaane. Ninkuhiga! Toki-tokibaasa kugaruka kutuma naabanganisa bundi." Ahabw'enki ebintu ebi nibikorwa? Kugira ngu abantu babaase kwikiriza. N'Ekigambo. Nikyo kirikworeka ngu eki ndikubabuurira n'Amazima, Ekigambo. Ekigambo kuba omuntu, kuba omuntu omuriwe; kuhinduka Ekigambo; kuhinduka Amagara omuriwe, kuhinduka Amagara omuriinye. Mwareeba?

Omufumu Omukuru! Ni kirungi, ka twinikye emitwe yaitu hati.

73 Mukama Yesu, Omufumu Omukuru hati ari haihi, Niiwe ogwo Mufumu. Naabuurira Ekigambo Kyawe, kandi Ekigambo Kyawe kyagira ngu Ori hanu; ngu Tohinduka, oku obaire ori nyomwabazyo n'eriizooba nikwo ori, kandi nikwo origuma ebiro byona; ngu Torikubaasa kuremwa. Tokatureebyaga, Mukama. Mbwenu hati, ka buri omwe omuri aba bantu abataire emikono yaabo ahari bagyenzi baabo, k'emigisha ya Ruhanga ebahtikyeho. Obwo turiyo nitwija nitushaba, kandi obwo turiyo nitubasiiga amajuta, omuriisa hamwe naanye, kandi nitubarabya omu runyiriri oru, ninshaba ngu buri omwe abaase kuraba hanu aine okwikiriza kukiikiriza, kumanya ngu Ruhanga w'omu Iguru wenyini ayemereire hanu hati. Ka buri omwe ayekunkumure. Nibabaasa omurundi gumwe ogu gwonka, Mukama? Ka babaase . . . ka kibaase kuhamira kimwe, Mukama, omurundi ogu. Igura amaisho gaabo, Mukama, kugira ngu babaase kureeba ekirikugyenda omu maisho, kandi barekye kuba empumi, nibagwererana, kureka okureeba Okubaho kwonyini kwa Yesu Kristo ozookire. Ikiriza kibeho, Mukama, okurabira omu Iziina rya Yesu. Amiina.

74 Ninkwehanangiriza omu Iziina rya Yesu Kristo, ngu otaija omu runyiriri oru kureka waaba nooyehuriram u ngu oine okwo Kwikiriza Okuhikiriire, 'habw'okuba nooba noomara obwire bw'abandi kwonka, obwire bw'ondijo muntu. Otakikora! Kandi ahabw'o . . . obwire bwona obu ndaababuuriire, ndaabagambiire ekintu kyona haza kitabeho? Buzima! Ekyo Mukama akakikora. Tarakikozire ahabwangye, niinyikiriza. Akakikora ahabwanyu, kugira ngu mubaase kwikiriza ngu eki ndikubagambira n'Amazima. Hati mukiikirize, nikiza kuba kurungi, kandi niki . . . nimwija kukira. Ku muraije hanu, munagye obutaikiriza bwanyu omuri eki . . . enshaho y'omwoyo eifo hanu. Timurikwija kugireeba, kwonka eriho. Ago majuta ku garaakuhikyeho, aho honyini onagyemu obutaikiriza gwawe. Ekyo kinagyemu reero oyegyendere n'Okwikiriza Okuhikiriire ngu okizire. Mwaza kukikora? Mukama abahé omugisha, obwo.

75 Ni kirungi, naaza kushaba omuntu orikubaasa kwebembera ebyeshongoro, ku . . . Omubuurizi ogwo omukuru arahi, ow'eishe-emwe, o . . . ? Nibamweta oha? Capps, Ow'eishe-emwe Capps. Ari omu runyiriri? Ekyo niki? Ija hanu, Ow'eishe-emwe Capps, kandi oyemerere hanu reero oyeshongore (abateeraine) obwo twena turiyo nitushaba, "Omufumu Omukuru hati ari haihi, obwo bari-bari . . . Buri omwe naayeshongora hati, n'omutima gwawe. Otafa kweshongora, eky'okureeberaho, "Naaza kweshongora: omufumu, omukuru, hati, ari, haihi, Yesu omusaasizi," torikweshongora oihire aha mutima gwawe, "ku, okushemererwa, Yesu omusaasizi." Oo, oo, oo mugyenzi!

Niinyenda kukihurira hati, mutegyereze; mweteguure. "Eego, Omufumu omukuru hati ari hanu, Yesu omusaasizi." Naahamya ngu Ari hanu! Nimwikiriza. Amiina.

76 Ni kirungi, ka . . . k'abo abaine okwikiriza baije omu maisho.

Omu Iziina rya Yesu Kristo, ninta engaro zangye aha w'eishe-emwe ogu. [Ow'eishe-emwe Branham yaashabira omurwaire -Omur.] . . . Nibo abo bonka?

Hati, ka twinikye emitwe yaitu hati. Omufumu omukuru hati ari haihi, Yesu Omusaasizi; Ku Agamba n'omutima ogushobeirwe gushemererwa, Oo, hurira Eiraka rya Yesu. Eiraka erirkukirayo oburungi omu kyeshongoro kya baaserafi, Eiziina erirkukirayo oburungi omu kanwa k'abantu; Ekyeshongoro ekirkukirayo oburungi ekireeshongoirweho, Ni Yesu, Yesu ohairwe omugisha..

77 Mwamanya eki naabakorera? Munyeta, "omuriisa waanyu"; kandi nikwo kiri, ahakuba ndiwe. Nyowe, omuriisa waanyu, Yesu Kristo ku araabe yampamya, ngu ninkora omurimo Gwe, kyo nimwikirize Ekigambo kyangye. Ahabw'okukora ekikorwa eki ky'okwikiriza, ahabw'okubataho engaro, naacwera omushango endwara n'okubonabonesibwa ebirkubateganisa. Ikiriza ekyo, reero noi ja kukorerwa eki waashaba, n'obu kyakuba kiri ki, ahakuba byona nibibaasika ahari abo abarikwikiriza. Kandi waashaba, oikirize ngu waahheebwa ebi waashaba. Kandi buzimazima niinyikiriza ngu naakiheebwa, kandi omu mutima gwangye niinyakiira buri omwe omuriimwe okutambirwa kwanyu, ninkwakiira, ngu kyakorwa. Ninkiikiriza, ninkiikiriza na byona ebiri omuriinye. Ekindi, n'engaro zangye nzitaire aha butambara oburi hanu, naaba mbuteireho omutima munonga, niinyikiriza ngu nibuza kurugwamu ekyo eki abantu bashabire. Ni-ninkiikiriza.

78 Eki nikitaaha omu Kukurura kwa Kashatu okwo! Ni-ninkiikiriza. Hati niinyenda kubabuza ekibuuzo nyihire aha mutima, imwe abaaheza kuraba omu runyiriri rw'ab'okushabirwa. Noobaasa buzima kwikiriza, kandi okeehuriram u hati, ngu hariho ekintu ekyabaho omunda yaawe okwiha obu waatebwaho engaro? Imutsya omukono gwawe! . . .? . . . Nkikyo aho. Eki nikyo tutwire tutegyereize. Hati, eki ti . . . Eki kyatandika kurabya hati. Mwareeba? Naatandika n'e . . . Eki naakikora ahabw'ekigyendererwa. Eki naakikora ahabw'ekigyendererwa. Hariho eki ndikukora, n'okwimutsya okwikiriza oku n'okugarukirayo kimwe kutandika reero kikataahamu; mwareeba, omuringo gw'okwimutsya okwikiriza kukahika ahu otakakureebahoga. Ti kwikiriza kw'obutoosha, kureka Okwikiriza okuhikiriire, kwombekirwe omunda hanu. Kandi reeba Ruhanga ohikiriire, aine omutima oguhikiriire, naarinda okuraganisa okuhikiriire, ahabw'Ekigambo Kye ekihikiriire, ekiine obwogi okukira rurara yoona ey'amoogi abiri kandi ekirahuka kucaaka ebi omuntu arikuteekateeka omu mutima gwe. Niki? Hati turiyo nituhika aha kuhikiirira, ahabw'okuba abantu nibateekwa kuhika ahari eki ahabw'Okutwarwa. Ekyo nikyo kizibiiire okutwarwa hati hati, n'okutegyereza egoy Kanisa kuhika omuri okwo Kwikiriza Okuhikiriire kw'Okutwarwa. Nkutegyereize. Nikimanyisa bingi munonga eby'okwekunkumuraho, nikimanyisa bingi ahariiwe, kwonka twena hamwe nitwija kusingura ahabw'Embabazi za Ruhanga. Amiina.

Omfumu Omukuru hati ari haihi,

Yesu omusaasizi.

Mukama Yesu, Ori hanu hati; twatunga ekihembo, Okubaho kwa Ruhanga. Ninshaba ngu Omwoyo Waawe Orikwera atume omuriisa ogu yaabaho kurungi; kandi omurinde, agume ari gye kandi aine amaani, omu rugyendo rwe okuhitsya obu Orimweta. Omu Iziina rya Yesu. Ninkishaba, Mukama, nimukunda. Twembi nitukishaba, kandi twembi twine okwikiriza! . . .? . . .

Ekyeshongoro ekirkukirayo oburungi ekireeshongoirweho,

Ai Yesu, Yesu ohairwe omugisha.

79 Nimumukunda? Muteekateekye kwonka: hanu honyini hati, yaatandikire omurimo omu mubiri gwawe, gw'okukutambira, ahabw'okuba Akaraganisa ngu kiryabaho. Mbwenu hati, mwareeba, mwayetegyereza eki naaba ningamba ekiro eki? Mwayetegyereza ekiito kyakyo? Mwareeba, "Ku origambira orushozi oru," otarikubanganisa, otarikubanganisa, okaikiriza eki waagamba. Hati kyetegyereze, omu bwire obutarikurenga edakiika itaano, buri mukono gwaza ahaiguru ngu omurimo gwaherize kutandika kukorwa omuribo hati hati. Oo, mugyenzi! Ngugwo aho. Ekyo kyakikora! Niki? Okubaho kw'Omufumu Omukuru.

Oo, ka twimutsye emikono yaitu ahari Ruhanga reero tukyeshongore ogundi murundi.

Omfumu omukuru hati ari haihi,

Yesu Omusaasizi;

Ku Agamba n'omutima ogushobeirwe gushemererwa,

Oo, hurira Eiraka rya Yesu.

Eiraka erirkukirayo oburungi omu kyeshongoro kya baaserafi,

Eiziina erirkukirayo oburungi omu kanwa k'abantu;

Ekyeshongoro ekirkukirayo oburungi ekireeshongoirweho,

Ai Yesu, Yesu ohairwe omugisha.

80 Ka twemerere ahabw'edakiika. Ka Tumuramye omu mitima yaitu. Kiteekateekyeho: Ruhanga, Ari hanu. Ari hanu. Oha? N'oha owaayeyorekire ku niwe Kigambo? "Bwa mbere na mbere hakaba hariho Kigambo, Kigambo ogwo akaba atuura na Ruhanga, kandi Kigambo akaba ari Ruhanga. Kigambo ogwo yaaba omuntu kandi yaatuura naitwe, tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Ekigambo kiine obwogi okukira rurara yoona ey'amoogi abiri, nikicaaka ebiteekateeko n'ebi omuntu amariiriire kukora (ekikureetsire hanu, ekigyendererwa ekikureetsire hanu, weena ori aha)"; kyorekire Yesu Kristo ku ni Mesia, kandi eriizooba Nikimworeka ku Ari Mesia otahinduka, oku abaire ari nyomwabazyo n'eriizooba nikwo ari kandi nikwo ariguma ebiro byona.

81 Omufumu Omukuru, Ogwo ori hanu, Owaagambire ati, "Obumanyiso oburiguma nibukuratira abarikwikiriza n'obu. Baryata engaro aha barwaire, bakire. Kandi ku origambira orushozi oru oti, 'Tsinduka,' otarikubanganisa mu mutima gwawe, okaikiriza ngu Naabaasa kuhanga kaamugye," otaine buryo bwona, nari hatariho ekintu kyona ky'okwikiriza; n'okwikiriza kwangye okurikugyenda kandi kukakora ekyo, okwikiriza kwangye omuri ekyo eki Yampigire ngu nshabe. Akampiga ngu nkishabe. Kandi naayakiira okuhiga Kwe omu kworobera Ekigambo Kye, naakishaba, kandi kyabaho! Ruhanga omu Iguru naamanya ngu ekyo n'amazima. Naabaasa n'okukiza abarwaire? Ku Araabe naabaasa kuunyimutsya n'okwikiriza ahaiguru ati, nangwa n'ahabw'abantu, n'obu baraabe batarikubaasa kutemba bakahika aho. Mwareeba? Ku baraabe batarikubaasa kukikora, Naabaasa kukozesa okwikiriza kwangye. Naabaasa kuunyimutsya ampitsye omu mwanya ogwo, reero mbatembere. Niinyikiriza ahabwanyu. Ningamba ahabwanyu.

82 Ndi ow'eishe-emwe mugyenzi waanyu, nyemereire nk'ow'eishe-emwe mugyenzi waanyu, omutonganirizi, ningyezaho nk'oku ndikubaasa kubagumya omu maisho ga Ruhanga. Kandi hati hati nyemereire hanu omu maisho g'Ekitebe Ekirikwera, kandi nintwara ekyo . . . nyorekire orukumu rwangye ahari ekyo kitambo ekirikujwererana eshagama aho, kandi ningamba okurabira omu Iziina Rye ku kihweire. Nikiteekwa kubaho, kandi nikiteekwa kubaho. Noomanya ngu kyaherize kubaho. Nimmanya ngu kyaherize kubaho, naiwe noomanya ntu kyaherize kubaho, kandi nikwo kiri. Ekyo kihikire. Amiina.

Ekyeshongoro . . . ekireeshongoirweho,

Ai Yesu, Yesu ohairwe omugisha.

Eiraka eririkukirayo oburungi omu kyeshongoro kya baaserafi,

Eiziina eririkukirayo oburungi omu kanwa k'abantu;

Ekyeshongoro ekirikukirayo oburungi ekireeshongoirweho,

Ni Yesu, Yesu ohairwe omugisha.

83 Na baadaimoni baatworobeire omu Iziina Ryawe, Eiziina eririkukirayo oburungi omu kanwa k'abantu. Baadaimoni . . . Ekyo-Ekyo nikizoora abafu, Ekyo nikikiza abarwaire, Ekyo nikishemeza ababembe, Ekyo nikibinga baadaimoni, Ekyo nikikora Abakristaaayo. Tihariho erindi Iziina ahansi y'Eiguru. Nindituaramu, Nkaribatizibwamu, Nndiikiriza, Ndiramizamu. Oo, ka mpindukye orugingo Rwaryo. Nyowe kanyeihedo; kwonka nditungye, Mukama, Omuriwe, Eryo Iziina eririkwetwa Yesu Kristo, Mesia oshukirweho amajuta, kugira ngu mbaase kwataguza ndabe omu byondo by'obutaikiriza kworeka oburungi bwa Yesu Kristo: otahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona.

84 Ruhanga abahe omugisha hati. Ku muraagarukye hanu Sande erikwija, muhe obujurizi oku mwatambiirwe, ekibaireho saabiiti egi. Mwetegyereze kandi mureebe ekiraabeho. Kihweire! "Noomanya ota?"

Yaangambiire "kukigamba," kandi naakigamba. Hati kihweire, kihweire. Kihweire. Ninkiikiriza. Hati, omuriisa, Ow'eishe-emwe Neville.

Mube murekire ahabw'akaanya kakye. [Omuntu yaagamba obutumwa omu rurimi orundi, kandi okurushoboorora, kwaruga omu bateeraine -Omur.] Eiziina rya Mukama rihimbisibwe. Ka twimutsye emikono yaitu kandi Tumuramye akaanya kakye. [Abateeraine baaramya.] Hati, nk'omwikiriza, waayetegyereze omwanya gw'obutumwa bwamara nibugambwa; n'eiraka eri bwagambwamu, kandi oyetegyereze okushoboorora kwabwo oku kwagaruka ku . . .? . . . Nikyo ekyo. Bwetegyereze eki bwaba buri, buzima buri hamwe n'Obutumwa, kandi burikuhamya ngu kyaba kiri Amazima, ngu Yaaherize kukora eki Yaakuraganiise ngu Aryakora. Yetegyereze oku bwagambwa, kandi ogarukye oyetegyereze oku bwashoboororwa. Yetegyereze obwire obu yaamara naagamba, kandi oyetegyereze obwingi bw'ebigambo ebi yaagamba; buzima nibingana.

Mukama abahe omugisha, okuhitsya obu ndaabareebe ogundi murundi.



www.messagehub.info

Obutumwa obu bukabuurirwa
William Marrion Branham
“... omu biro by'eiraka ...” Kush 10:7